

Je'ej ti tyo'tyéyu'si'huaca' a'íjma jimi i maj Israel jitze ajtyáma'can

A'íi pu Ciríistu' tyitáa'ixaaj i Dios jitze ma'can

1 ¹A'yaa pu jájcuaj imuáj i Dios mue'tíj tyihuó'ixaaj i tahuásimua'ci'ij, ajta quee séej na'aj jime' i nyúucarij, a'yaa pu séecan tyu'ta'ít'yaca' mej mij jitzán ma'can tyu'taxáj. ²Ajta ijíj, tí'ij arí néijmi'i tye'entyipua'rij, Dios pu i juyó j ujo'ta'ít'yaca' tí'ij a'íin tyitaaté'exaatye'en jitzán ma'can, a'íj pu jitzán ma'can jaatyátaahuaca' i cháanacaj, ajta je'en a'yan tye'entyíhuo tí'ij néijmi'i tyá'ci'tyij a'íjci i yójra'. ³A'íi pu a'íin pué'een i ti jin huápu'i'ij tyámua' naa huasé'rin i Dios, ajta i tyévira' a'yan cha'tána'aj huasé'rin tí'ij ajta i Dios, a'íi pu néijmi'i tyí'vi' tí'ij na'aj i ti tyí'sejre' a'íjna jime' i junyúuca. Tí'ij tyitacá'ri'raj i tyaj jin ootyá'ítzee i Dios jimi, aj pu'ij huatyéeyixij i ipuárij japua muáca'ta' i Dios, ⁴ajta a'yan tye'rájraa ti a'íin jéetze' va'cán jin tyi'tyaváaj ta'raa, mequee a'íimaj i maj tajapuá tyí'huüre', ji'nye a'íj pu jin tye'entyájrurij i ti jéetze' juxie've' jime' mequee a'íimaj i maj tajapuá tyí'huüre'.

A'íjna i yójra' i Dios jéetze' pu va'cán jin tyi'tyéjvee mequee a'íimaj i maj tajapuá tyí'huüre'

⁵Ji'nye i Dios capu a'náj a'yan séej tyu'té'exaaj a'íjma i maj tajapuá tyí'huüre' yee:

Muáj paj nyiyóoj pué'een,
nyáaj nu ijíj mua'antyíhuoo.

Capu ajta a'yan séej tyu'té'exaaj a'íjma i maj tajapuá tyí'huüre' yee:

Nyáaj nu táatajra' pue'éenye'ej na'mej,
ajta a'íin nyiyóoj pu pue'éenye'ej ta'mej.

⁶Ajta a'íjna jitze ma'can i juyó j, a'yaa pu tyihuoté'exaaj a'íjma i maj a'yan cháanacaj japua huacháatimee tíjin:

Miche' néijmi'i i maj tyí'huüre' i Dios jimi jaatyáanajche.

⁷Ajta a'íjma jimi i maj tajapuá tyí'huüre', a'yaa i Dios tyí'xaj tíjin:

A'yaa pu huá'uurej a'íjma i maj tajapuá tyí'huüre' tí'ij áacaj,

ajta a'yan huá'uurej ti'ij tiéj a'íjma i ti tyihuá'ijtye'.

⁸Ajta a'íjna jitze ma'can i juyó, a'yaa pu tyí'xaj tijin:

Muáaj mu paj Dios pué'een, capu a'náj antyipu'a'rij i paj jin antyía'mua'reej,

ajta i paj jin tyí'tyéjvee ji'rénnya'aj pu séejre', pajta a'yan tyí'ijta je'ej ti tye'tyévijtye'.

⁹Muáaj paj jaxie've' i ti tyámua' een pajta quee jaxie've' i ti je'ej pua'aj een,

a'íj pu jin i Dios mua'antyíhuoo, a Dios,

ajta muaatá' i paj jin jéetze' huatá'tyamua've'en

mequee a'íimaj i a'tyéityeristyamua'.

¹⁰A'yaa pu ajta tyí'xaj tijin:

Muáaj nyavástara', jájcuaj imuáj paj jaatyátaahuaca' i cháanacaj, pajta a'íjna huatyátaahuaca' i tajapuá ti séejre'.

¹¹Ajta néijmi'i pu tye'entyipua'rij ti'ij na'aj pua'máj tyí'sejre',

pajta muáaj, jusén paj jin séeria'aj puá'mej.

Néijmi'i pu a'yan tyu'tyemí'ma'cantarij ti'ij i cáanarij,

¹²a'yaa paj tyeetyátutaj ti'ij i cáanarij tyí'tutzijhuacaa,

a'yaa paj néijmi'i seequéj tyí'uurej, ti'ij a'tíj ti seequéj eenye' tyu'tyóochejtye'en.

Pajta muáaj paj póoche' a'íin pana'aj pué'een,

capáj a'náj á'pua'ren.

¹³Capu i Dios a'náj séej a'yan tyu'té'exaaj a'íjma i maj tajapuá tyí'huüre' yee:

Huatyéyixi' i nyamuáca'ta',

'asta nyana'aj quee huo'mué'tin a'íjma i maj muájcha'üre' mej mij muéetzij mua'rá'astijre'en.

¹⁴Ji'nye néijmi'i i maj tajapuá tyí'huüre', a'íi mu a'íin pué'een i

júuricamej Dios ti tyihuá'ijtye', mej mij huo'tyáhuüre'en a'íjma i ti

huá'ci'tyij ti Dios hua' japua huatányuunyij.

Tyiche' ja'rá'astijre'en a'íjna i tyaj jáanamujri'

2 ¹A'íj pu jin a'yan tyúuxie've' tyaj jéehua tyámua' naa tyáanamuj a'íjna i nyúucarij, tyej tyij quee ajtáciinyej a'íjna

jitze i juyéj. ²A'íjna i nyúucarij i ti Dios ará'tyeej jaataxájtaca'

a'íjma jimi i maj tajapuá tyí'huüre', a'íi pu ajta tyí'huüria'ca'aj,

majta a'íimaj i maj quee ja'rá'astijrej, a'yaa pu puéjtzij tyihuo'ci'ij

je'ej ti tye'tyévijtya'ca'aj. ³Ji'nye ij tyí'rij tiquee puéjtzij

táaci'tyij tipua'aj a'yan tyetyá'xaahuataj a'íjci i nyúucaria'ra' i

Dios, ti ajta jéehua huápu'ij juxie've'? Ji'nye a'íi pu i tavástara'

anaquéj a'yan tyaataxájtaca', majta je'en séecan a'yan

tyaataxájtaca' je'ej maj tyáanamujri' a'íjci i nyúucarij. ⁴Dios

pu ajta jaataséjrataca' a'íjci jime' ti a'yan huaríj tyi'tíj jime' ti

huápu'i'ij naa huasé'rin, ajta jaatyá'jtoos i ju júuricamej hua'tzajta' je'ej ti tya'ránajchaca'.

Ciríistu' pu a'yan ajta tyu'nié'huaca' mati'ij i ihuáamua'mua'

⁵Capu i Dios jaatyá'jtoos a'íimaj jimi i maj tajapuá tyí'huiire', mej mij a'íjci jin antyúumua'reeriaj muá'ra'nyij i cháanacaj tyaj japuan huacháatima'aj tá'ju'un, a'íjna i tyaj a'yan jime' tyí'xaj. ⁶A'yaa pu'uj a'tíj a'náj tyí'xajtaca'aj tíjin:

¿Tyi'tanyí je'ej tyi'pué'een i tyé'vij?

¿Tyi'tanyí jin mua'antyúumua'ree i tyétyacaa?

¿Ji'nye pej pij hua'tamuá're'rii majta a' jitze juxie've'?

⁷A'yaa paj jáaruuj tí'ij jéetze' ciléenye' jin tyi'tyaváaj tá'ra'nyij, mequee a'íimaj i maj tajapuá tyí'huiire',

pajta tyámua' tyaatá', a'íjci jime' paj ja'antyíhuoj tí'ij jéehua huápu'i'ij tyáaci'tyij, majta néijmi'i tyámua' jo'taséj,

⁸pajta néijmi'i tyaatá' tí'ij tyi'tíj jin antyúumua'reeriaj, mej mij a'íjna jin ja'rá'astijre'en.

A'yaa pu'ij, tí'ij néijmi'i jimi tyu'tyátuihuaca', Dios pu ajta néijmi'i tyaatá'. Ajta ijíj capu eexúj séejre' maj néijmi'i já'astijria'aj. ⁹Tyajta a'yan tyé'sej a'íjci i Jesús, ti i Dios a'yan jáaruuj tí'ij cfi na'aj á'tyeevi' ti jéetze' ciléenye' jin tyi'tyaváaj tá'ra'nyij mequee a'íimaj i maj tajapuá tyí'huiire', a'íi pu ijíj va'cán jin tyi'tyéjvee, a'íjna jime' ti a'íin jaapuéjtzitariaca' tí'ij huamuí'. Dios, i ti jéehua taxie've', a'yaa pu tyu'tá' tí'ij i Jesús néijmi'caa jitze ma'can huamuí'nyij, ajta je'en néijmi'caa táahuire'en.

¹⁰Néijmi'i i ti tyí'sejre' Dios pu tyá'rij ajta néijmi'i jimí tyí'sejre' a'íjna jime' ti a'íin néijmi'i tyú'taahuaca', a'yaa pu'ij tyá'xie've' mej mij néijmi'i i yójmua'mua' jimí huatyá'itzeere'en jusén jime'. A'íj pu jin i Dios, a'yan tyaanéijmi'tarej a'íjna jime' ti jaapuéjtzitariaca' i Ciríistu' ta'aj ij tyámua' tyú'uurej, ajta néijmi'caa táahuire'en.

¹¹Ji'nye néijmi'i mu séej mana'aj jitze ajtyáma'can, a'íijma i ti huatyóa'rij, ajta a'íijma a'íin ti arí hua'antyívi'tica'aj. A'íj pu jin, capu jatyevi'raste' a'íjci yójra' ti a'yan hua'tamuá'muatya'an yee: “Nye'ihuáamua' mu pué'een”, ¹²ajta a'yan tyu'taxájtaca' i yu'xarij jitze tíjin:

Nyetyihuo'té'exaatye'sij muéetzij jitze ma'can i nye'ihuáamua', nyajta tyu'táchuiicaj hua' tzajta' a'íijma i maj jusi'rii.

¹³A'yaa pu ajta tyí'xaj tíjin:

A'íj nu jitze tyi'ijchó've'ej na'mej.

Ajtáhuaja'aj a'yan tíjin:

Yá'nyaj huatyéjve, hua' jamuán i yójmua'tyee i Dios ti naatávi'tistej.

¹⁴A'yájna mati'ij a'íimaj i yójmua'mua' i maj seequéj aja'chej, juxa'aj mana'aj eenye' tyáhue'ra', majta juxa'aj eenye' tyáaxure', a'yaa

pu ajta i Jesús huóoruuj ti'ij a'yan cha'tána'aj eenye' tyáhue'ra', ajta a'yan eenye' tyáxuure'ej, ta'aj ij ja'antyipuá'ritye'en a'íjci i ti a'íjna jin antyúumua'reeriaca'aj ti huó'cui'nyij ti tye'ítyee, a'íi pu a'íin pué'een i tyiyáaru'. ¹⁵A'yaa pu'ij tyihui'rájtoo a'íijma i maj a'yan séjria'ca'aj mati'ij i maj ca'nyéjrij jin tyí'muarie' a'íjna jime' maj tyí'tziinya'ca'aj maj huá'cui'nyij. ¹⁶A'yaa pu tyi'ja'yájna, tiquee a'íjna jin mujo'vé'mej ti'ij a'íimaj huatyáhuire'en i maj tajapuá tyí'huire', sulu ta'aj ij a'íijma huatyáhuire'en i maj Abraham jitze eeráma'can. ¹⁷A'íj pu jin a'yan huó'ruuj mati'ij i ihuáamua'mua', ta'ij ij a'íjna jin tye'entyájrutyey i ti néijmi'i jin tyu'tyáhuire'en i Dios jimi, ajta a'yan tyihuá'ancu'vaxij i tye'ítyee, ajta tyihuacáari'ri' i maj jin ootyá'itzee i Dios jimi. ¹⁸Ajta je'en a'íin jaapu'éjtzitariaca', ajta tyo'táviicue'ri', ijíj pu arí i'ríj ti a'íin huo'táhuire'en a'íijma i maj á'viicue're' tyi'tíj jime'.

Jesús pu jéetze' va'cán jin tyi'tyéjvee quee a'íjna i Moisés

3 ¹A'yaa pu'ij, nye'ihuáamua', mua'aj xu i Dios jitze ajtyáma'can, ajta a'íin jamuaatajé siaj sij néijmi'i jimi huatyá'itzeere'en, siata'aj tyámua' a'íj jitze tyú'mua'tyij i Jesús, i Dios ti uyo'ta'ítyaca' ajta a'íin néijmi'i jin tyí'huire' i Dios jimi, a'íi pu ajta taaté'exaa a'íjna i nyúucarij i tyaj jitzán tyá'tzaahuatye'. ²Ji'nye a'íi pu i Jesús néijmi'i jin tyámua' tyí'sejre' i Dios jimi, i ti ja'antyíhuoj ti'ij a'íjna jin tyu'tyáhuire'en, a'yájna ti'ij ajta i Moisés néijmi'i jin tya'rá'astej ti'ij tyí'huiria'ca'aj i chi'ra'an tzajta' i Dios. ³Ajta i Jesús Dios pu jéetze' pu va'cán tye'entyáaruujtyey, quee a'íjci i Moisés, a'yájna tyati'ij tyajta jéetze' tyámua' tya'tá'caa a'íjci i ti chi'ij tyí'ta'huacaa tyequée a'íjci i chi'ij. ⁴Néijmi'i i chi'ij ti tyí'sejre' a'tíj pu ja'ajtaahuaca', ajta i Dios pu a'íin pué'een i ti néijmi'i tyú'taahuaca' ti'ij na'aj i ti a'yan tyí'sejre'. ⁵A'yaa pu'ij, a'íjna i Moisés, i ti tyi'tíj jin tyí'huiria'ca'aj, néijmi'i pu jin tyámua' huaríj i chi'ra'an tzajta' i Dios, a'yaa pu tyí'huiria'ca'aj ti'ij jaataxáj je'ej ti tyi'tíj i Dios tyu'taxájtaj. ⁶Ajta i Cirístu', i ti yójra' pué'een, a'íi pu néijmi'i jin tyámua' tyí'huire' i chi'ra'an tzajta' i Dios, ajta a'íjna i chi'ra'an ityáj tu a'íin pué'een i tye'ítyeristyamua'me'en, tipua'aj tyetyo'táviicue' tyej tyámua' eenye' tyajta tatyamua've'ej a'íjci jime' i tyaj jitzán tyi'ijchó've'.

I Dios jimi mu juso'pe' a'íimaj i maj tye'ítyeristyamua'me'en pué'een

⁷A'íj pu jin, a'yájna ti'ij tyí'xaj i júuricama'ra' i Dios i yu'xarij jitze a'yan tíjin:

Tipua'aj mua'aj ijíj siáanamua'aj je'ej ti i Dios tyí'xaj,

⁸caxu tyi'tyánaamuan i juxiéjnyu'caa tzajta', mati'ij a'íijma i maj quee jáanamua'ajri',

majta je'en tyi'tíj jin jaatatyésej i Dios a'ájna jo'tij quee já'tyil'tij.

⁹ A'áa mu tyi'táj jin natatyésej a'íimaj i já'muahuasimua'ci'ij, majta a'áa já'tyeej huá'puatyej nyinyi'ra'aj metyi'séeraj je'ej nyaj tyi'táj jin rijcaj.

¹⁰ A'íj nu jin huo'tájaaxieji'ri' néijmi'caa a'íimaj i tye'ítyee, nyajta a'yan tyu'taxájtaca' tíjin: "A'náj tina'aj mu je'ej pua'aj tyí'mua'tzej i jutzájta', majta quee a'náj jaxie've' maj jáamua'tyij je'ej nyej nyáaj tyí'ijta."

¹¹ A'íj nu nyij jin nyú'camui'ij a'yan nyetya'tányaratziiri' maj quee a'náj ujo'tyárutyij jo'maj ja'huóoso'pe'en nyajamuan.

¹² Nye'ihuáamua', tyámua' xu'uj mua'aj tí'ij quee síij ti ja'mua jitze ajtyáma'can je'ej pua'aj tyi'tyúucha'íij i jutzájta', nusu tiquee ajta che' tyá'tzaahuatye'ej, tí'ij a'íjna jin ajtára'nyij i Dios jimi ti júurij.

¹³ Sulu siata'aj ca'nyíjra'aj huatóoa'an séej siajta séej jamuán a'náj tina'aj, íjij sij sioo júurij, tí'ij quee síij tye'tyánaamuan i jutzájta' tyi'táj jime' ti huet'zij pué'een ajta je'en a'íjna jin je'ej pua'aj huárinyij.

¹⁴ Ji'nye a'yaa pu ityájma tyi'táj tyí'taci'tyij jamuán i Círístu', tipua'aj tyetyo'táviicue' tyaj a'náj tina'aj tyámua' eenye' 'asta na'aj quee néijmi'i tye'entyipua'rej, a'yájna tyati'ij tye'ejchó'va'ca'aj tya'ti'ij huatyátahuij.

¹⁵ A'íj pu jin a'yan tyá'xaj i yu'xarij jitze tíjin:

Tipua'aj mua'aj íjij siáanamuj je'ej ti i Dios tyí'xaj, caxu tyi'tyánaamuan i jutzájta', mati'ij a'íimaj i maj quee jáanamujri'.

¹⁶ ¿A'tyaanyíj maj a'íin pué'een i maj quee ja'rá'astej mati'ij jáanamujri' i nyúucaria'ra' i Dios? A'íimaj mu a'íin pué'een i Moisés ti hui'rájtoj a'ájna a Egipto. ¹⁷ Ajta a'íijma i Dios ti huá'puatyej nyinyi'ra'aj huá'jaaxieji' a'íimaj mu a'íin pué'een i maj ootyá'ítzee i jimí, majta je'en huá'cuii a'ájna jo'tij quee já'tyi'táj. ¹⁸ A'íi mu majta a'íin pué'een i ti Dios hua' jime' a'yan tya'tóoratziiri' mej mij quee a'náj ujo'tyájrutyey jo'maj ja'huóoso'pe'en, a'íjna jime' maj quee ja'antzaahuaj. ¹⁹ A'yaa pu tyi'ja'yájna, a'yaa tu tyá'mua'reej tiquee a'yan tyihuo'ci'ij maj ujo'tyájrutyey, ji'nye camu tyá'antzaahuaj.

4 ¹ A'íj pu jin, íjij tu ooj je'ej tyí'ri'ij tí'ij táahuire'en a'íjna i Dios ti jin tya'tóoratziiri' tyej tyij ujo'tyájrutyey jo'tyaj ja'huátaso'pe'en, tyiche' tyámua' tyi'huátacha'íin, tí'ij quee síij tyi'táj jin ootyá'ítzeere'en ajta je'en quee jáaci'tyij ti a'áa jo'tyájrutyey.

² Ji'nye ityáj tu ja'ancuriáa' a'íjna i nyúucarij i Dios ti jin tí'rátosij, ajta a'íijma capu huo'tyáhuui mati'ij jáanamujri', ji'nye camu a'yan huaríj tí'ij tyé'íjtaca'aj i nyúucarij maj jáanamujri'. ³ Tyajta ityáj, i tyej tyá'antzaahuaj, ityáj tu a'áa jo'tyárutyij jo'tyaj ja'huátaso'pe'en, a'íjna i ti Dios jin a'yan tyu'taxájtaca' hua' jime' tíjin:

A'íj nu jin nyú'camui'ij nyetya'tányaratziiri', mej mij quee a'áa jo'tyájrutyey jo'maj nyajamuan ja'huóoso'pe'en.

Ajta i Dios jimi pu'ríj néijmi'i tyí'ci'pii huaca'aj ti'ij na'aj tyeetyátaahuaca' i cháanacaj, ⁴ji'nye a'yaa pu tyá'xaj i yu'xarij jitze a'ájna jime' i xicáara' ta'ráahua'puaj tijin:

Dios pu huóoso'pej ti'ij ja'antyci'ij i ti jin tyu'muáriej a'ájna xicáara' jitze i ta'ráahua'puaj.

⁵Ajtáhua'aj pu a'yan tyá'xaj yu'xarij jitze tijin:

Camu a'áa jo'tyáru'tyij jó'nyaj huaja'tá'caa mej mij huóoso'pe'en.

⁶Ajta móoche' mu séecan á'itzeere' maj a'áa jo'tyá'rutyej jo'maj jamuán ja'huóoso'pe'en i Dios, a'íimaj i maj quee a'áa jo'tyá'rupij, a'ájna jime' maj quee ja'rá'astijrej a'íjci i nyúucarij i Dios ti jin hui'ratonyíche'. ⁷A'íj pu jin i Dios arí ajtáhua'aj séej xicáara' jitze tya'táraj ajta a'yan jaatamua'aj tijin: “íjij”, a'ájna pu jimi a'yan ará'tyeej tyaataxájtaca' i David a'náj ti a'yan atyojo're'nyesij, a'yaa pu tyu'taxájtaca' tijin:

Típua'aj íjij mua'aj siáanamua'j je'ej ti tyí'xaj i Dios, caxu tyi'tyánaamuan i jutzájta'.

⁸Ji'nye típua'aj a'ájna i Josué huo'tá'nyijche' maj huóoso'pe'en a'íjma i maj Israel jitze ajtyáma'can, capu i Dios a'yan tyataxáatajche' ajtáhua'aj séej xicáara' jitze. ⁹A'íj pu jin óoche' á'itzeere' hua' jimi i tye'tyeristyamua'me'en i Dios mej mij jamuán huóoso'pe'en, ¹⁰ji'nye a'ájna i a'tíj ti a'áa jo'tyáru'tyij jo'tij i Dios tyihuaja'tá'caa ti'ij a'tíj huóoso'pe'en, a'yaa pu tyá'ci'tyij ti huóoso'pe'en i ti jin tyí'muarie' ti'ij ajta Dios tyi'huóoso'pej. ¹¹A'íj pu jin, tyiche' ca'nyíjra'aj huatáta'an tyej tyij tyámua' eenye' ajta ij táaci'tyij tyaj a'áa jo'tyá'rutyej jo'tyaj ja'huátaso'pe'en, ta'aj ij quee a'tíj a'yan rijcaj mati'ij jájcua'j ímuáj huaríj i maj quee tyá'antzaahuaj.

¹²Ji'nye a'ájna i nyúucaria'ra' i Dios, a'íi pu júurij ajta néijmi'i putyí'uurej. Ajta jéetze' tyí'huíire' quee i chúun ti juxa'aj tya'antámuamuaa, a'íi pu tyáru'pij i xiéjnyu'caria'ra' jitze i tyévij, ajta i mua'tzíiria'ra' tzajta', ajta jaayí'tin ti jáamua'reej je'ej ti síij tyí'mua'tzej, ajta je'ej ti síij tyá'xie've' i juxiéjnyu'caa tzajta' ti'ij tyi'tíj jin je'ej huárinij. ¹³Ajta néijmi'i i Dios ti tyú'taahuaca' capu tyi'tíj i'ríj ti'ij jimi huatyóo'avaaj, néijmi'i pu jimi tyí'sejre', ajta a'yan tyúuxie've' tyaj néijmi'i jimi huatátasejrataj.

Jesús pu a'íin pu'éen i ti jéetze' va'cán jin tyi'tyéjvee

¹⁴A'ájna i Jesús, i ti yójra' pu'éen i Dios, a'íi pu a'íin pu'éen i ti tajimí va'cán jin tyi'tyéjvee i Dios jimi, ajta arí tajapua' jo'ojnyéj. A'íj pu jin tyiche' tyámua' eenye' i tyaj jitzán tyá'tzaahuatyé'. ¹⁵Ji'nye a'ájna i ti tajíme' va'cán jin tyi'tyéjvee i Dios jimi, a'íi pu jaayí'tin ti'ij tá'ancu'vaxi'ín a'ájna jime' tyaj quee taca'nyej i tatzájta', ji'nye a'íi pu ajta a'yan tyaapu'éjtzitariaca' tyati'ij ityáj, ajta a'ájna capu a'náj tyi'tíj jin ootyá'itzee. ¹⁶Tyiche' taxáahuaj ajtyáxiirej jo'tij jo'tyéjvee i ipuárij

i ti jitzán acájca i Dios ti jéehua taxie've', ti'ij a'fín tá'ancu'vaxi'in ajta je'en táahuiire'en tyati'ij á'viicue'ria'aj.

5 ¹Néijmi'i i maj va'cán jin tyí'huiire' i Dios jimi, a'fi mu a'yan tyihua'vá'huosij i tyeétyee, mej mij a'fjna jin antyúumua'reerij mej mij hua' japua huatányuunyij i Dios jimi, ajta mej mij tyu'támu'vejritaj i Dios jimi, majta ya'muáatyee huatámu'vejritaj a'fjci jime' i maj jin ootyá'itzee. ²Ajta a'fjna i ti tyi'táj jin tyi'tyéjvee a'fijmaj mu tyé'ijtye' i tyeétyee, a'fj pu jin i'ríj ti'ij hua'ancu'vajxi'in a'fijmaj i maj quee tyi'táj mua'reej, majta i maj tyi'táj jin á'itzeere' i Dios jimi, ³ajta a'fjna jime' ti'iquee juca'nyej a'fj pu jin juxie've' ti anaquéej tyu'támu'vejritaj a'fjna jime' ti a'fín ootyá'itzee i Dios jimi, ajta je'en a'fijma jime' i tyeétyee i maj a'yan cha'taj mana'aj tyi'táj jin tyityo'tyá'itzeerej i Dios jimi. ⁴Capu i'ríj ti a'táj jusíj a'fjna jin tye'entyájrutyey, sulu Dios pu a'yan tyaata'ijtye'sij, a'yájna ti'ij tyaata'ij a'fjci i Aarón. ⁵A'yaa pu cha'tána'aj, a'fjna i Ciríistu' capu jusíj antyúuhuoj ti'ij va'cán jin tye'entyájrutyey, sulu Dios pu a'fjna jin tye'entyáaruptyey, ji'nye a'fi pu a'yan tyaaté'exaa tijin:

Muáaj paj nyiyóoj pué'een,

ijíj nu a' táataj pue'éenye'ej na'mej.

⁶A'yaa pu ajtáhua'aj tyaaté'exaa i yu'xarij jitze tijin:

Muáaj paj jusén jime' va'cán jin tyi'tyaváaj puá'mej i Dios jimi a'yájna ti'ij ajta a'fjna i Melquisedec.

⁷Ti'ij ooj i Ciríistu' a'yan séjria'ca'aj i cháanacaj japua, a'yaa pu jéehua tyu'tyéenyuj ajta huóoyiinyaca' a'fjna jimi i Dios, i ti a'yan tyee'yí'tin ti japuan huatányuunyij ti'ij quee huámu'i'nyij, ajta néijmi'i tya'rá'astej, a'fj pu jin i Dios jánamuajri'. ⁸A'yaa pu'ij a'fjna i Ciríistu', i ti yójra' pué'een i Dios, a'yaa pu tyapuéetzitarej ti'ij ij jáamua'reeri' i ti néijmi'i tya'rá'astijre, ⁹ajta ti'ij néijmi'i jin tyámua' huaríj, aj pu'ij a'fjna jin tye'entyájrupij ti'ij a'fín hui'rátóonyij jusén jime' néijmi'caa i maj jimi tyá'tzaahuatye', ¹⁰ajta i Dios a'fjna jin tye'entyáaruptyey ti'ij va'cán jin tyu'tyáhuire'en i Dios jimi, a'yájna ti'ij ajta tyu'tyáhuui a'fjna i Melquisedec.

Maj jéetze' tyámua' tyá'antzaahuatye'en i Dios jimi

¹¹Jéehua tu tyajá'mua'ixaatye' a'fjci jime', ajta tyési' tyej tyij tyámua' naa tyajamuaaté'exaatye'en, ji'nye caxu mua'aj jiye'tzín yo'itéej xá'ju'un. ¹²Maj siajta seríj á'tyeej, pu'ríj a'yan tyi'xá'pui'intacaj siaj sij mua'aj tyihuó'mua'tyey, maj siajta quee caxu, sulu a'yaa pu tyúuxie've' ti a'táj ajtáhua'aj tyajamuáamua'tyey a'fjna jime' i nyúucarij i maj jin huatyóohuij. A'yaa xu een mati'ij a'fijmaj i ti'ríj maj jumua'tij léechij ya'caa, maj quee xu yó'japui'ra' i cue'ráj. ¹³A'fijmaj i maj i léechij jin júurij a'yaa mu een mati'ij i ti'ríj i maj móoj huá'tzi'tyey, a'fj mu jin quee xu yó'itej a'fjci i nyúucarij i maj

jín tyihuo'muá'tyej je'ej ti sñij tyi'tyúucha'ij i Dios jimi. ¹⁴A'ñna i nyúucarij a'yaa pu tyí'huüre' t'i'ij i cue'ráj i maj jacua'caa i maj huásaj, i maj meríj jamua'reej tyi'táj ti xá'pui' ajta i tiquee xá'pui', ji'nye mu'ríj jaayí'tin a'ñci jime' maj tyámua' tyityetyúucha'ij i Dios jimi.

6 ¹A'ñj pu jin tyiche' huaju'un tyej tyij jéetze' huahuóse'en i Dios jimi, tyata'aj tyij jéetze' jáari'rej i nyúucaria'ra' i Ciriistu'. Tyiche' quee a'ñj tyana'aj namuajraj i nyúucarij ti jime' jaxaj tyej tyij seequéj tyú'mua'tyij, a'ñci jime' i yi'ráj tiquee tyi'táj huüre' i Dios jimi, nusu i nyúucarij ti jaxaj tyej tyij tyá'antzaahuatye'en i Dios jimi, ²je'ej maj tyitaamuá'tyej tyej tyij huái'huaca' i Ciriistu' jitzán ma'can, nusu i tyaj hua'vá'muarie'xi'in a'ñjma i maj tyá'tzaahuatye', ajta a'ñna jime' i nyúucarij ti jaxaj a'náj maj huatájuuritaj a'ñmaj i maj meríj huácuij, ajta ti i Dios huá'xijtye'en séej ajta séej je'ej ti tyá'ci'tyij jusén jime'. ³A'yaa tu néijmi'i jin rinyij tipua'aj i Dios a'yan tyitatá'care'en.

⁴Ji'nye a'ñmaj i ja'antzaahuaj i nyúucarij ti a'yan tyi'ja'yájna, mu'ríj jaamua'aj a'ñna i Dios ti huo'tapuejve, majta ja'ancuriáa' i júuricama'ra' i Dios, ⁵a'ñi mu majta jaataxié'vej a'ñci i nyúucarij ti jéehua tyí'huüre' i Dios ti jimi jo've'mej, majta ja'ancuriáa' a'ñna i ti jin i Dios tyu'ta'íjtaj jusén jime', ⁶tipua'aj a'ñmaj majtáhua'aj je'ej pua'aj huárinyij, capu che' je'ej tyí'rij mej mij majtáhua'aj jitzán ajtyáhuixi'in i Dios, ji'nye a'ñi mu majtáhua'aj jó'tateesij i cúruuj jitze a'ñci i ti yójra' pué'een i Dios, majta hua' tzajta' i tyeítyee jaatyáxaahuataca'. ⁷A'yaa mu een t'i'ij i chuéj i maj japuan huáviiyaca' ajta je'en néijmi'i i chuéj tzajta' ajo'cárutyij i jájtyij, aj pu'ij japuan tye'ejnyésij i ti tyu'tyáhuüre'sij a'ñjma jimi i maj japuan tyu'huástej, ⁸ajta tipua'aj japuan ajnyéj a'ñna i tzícare'ej, ajta a'ñna i ti jéehua tyi'tyáxamue', capu tyi'táj huüre' a'ñna i chuéj, aj pu'ij a'yan tye'mej ti i Dios je'ej pua'aj ja'uurej, ajta je'en jaatyáteeraj.

⁹Tyij tyajta a'yan tyajá'mua'ixaatye', mua'ajmaj nye'ihuáamua' mu tyaj jéehua já'muaxie've', a'yaa tu tyámua' tyá'mua'reej sij mua'aj a'ñn pué'een i sij tyámua' tyityaajjú' t'i'ij jamuáahuüre'en. ¹⁰Ji'nye Dios pu tyámua' rinyij ja'mua jimi, ajta quee yo'huá'xij je'ej sij tyu'muariej, ajta a'ñna jime' sij huo'taxié'vej i Dios jitze maj ajtyáma'can, a'yájna siati'ij siooj ricij. ¹¹A'yaa tu tyá'xie've' sij mua'aj a'yan sñij ajta sñij tyúusejrataj sij jutyamua've' a'ñna jime' je'ej sij tyí'muarie', ta'aj ij néijmi'i a'yan atyojo're'nyej je'ej sij tyi'ijchó've'. ¹²Catu jaxie've' sij huí'na'sa'aj, sulu siata'aj a'yan huárinyij mati'ij a'ñmaj i maj tya'ancuriáa'sij i ti jin Dios tyihua'táratziiri' a'ñna jime' maj tyá'tzaahuatye' majta néijmi'i jin tyo'táviicue'ri'.

¹³Ti'ij i Dios a'yan tya'táratziiri' a'ñci i Abraham, a'ñi pu a'yan tyaaté'exaa i junyúuca jime', ji'nye capu aja'ja'tiitaca'aj ti jéetze' va'cán jin tyi'tyávaaca'aj t'i'ij nyúucarij jin tya'táratziij, ¹⁴a'yaa

pu tyaaté'exaa tijin: “Nyáaj nu jéehua muaatyáhuire'ej, nyajta huo'támui'rej a'íjma i maj muéetzij jitze eerama'cáantaj muá'ju'un.”
¹⁵ Ajta a'íjna i Abraham a'tyéevi'ij pu tyu'chó'vej juxié'vi'ra' jime', aj pu'ij ja'ancuriáa' a'íjna i ti jin Dios tya'táratziiri'. ¹⁶ Tipua'aj i tyeétyee tyi'tíj jin metya'tóoratzi, a'íj mu jimi tya'tóoratziiraj i ti jéetze' va'cán jin tyi'tyéjvee mequee a'íimaj, ajta mati'ij tyi'tíj a'yan tyu'taxáj, a'yaa mu tyá'mua'reej ti a'yan tye'mej je'ej maj meríj tyaaxá'pui'intarej, a'íj pu jin quee che' je'ej tyi'ri'ij maj seequéj tyaataxáj. ¹⁷ A'yaa pu'ij, Dios pu a'yan tyaaxá'pui'intarej ti'ij huo'taséjratye'en tyámua' naa a'íimaj i ti huá'ci'tyij je'ej ti a'ín tyihua'táratziiri', mej mij jáamua'reej tiquee seequéj ja'uurej a'íjci i ti jin arí a'yan tyaaxá'pui'intarej. A'íj pu jin a'yan tya'tóoraj ti néijmi'i jin a'yan huárinyij je'ej ti tyu'taxájtaca'.
¹⁸ A'íjna i ti tyí'hua'puaj tiquee i'ríj ti seequéj jáa'uurej, ti ajta quee i'ríj ti Dios jaatyáahue'taj, a'íj tu jitze huatyátaca'nyej ti'ij Dios táahuire'en tyajta a'íjna jitze tyí'ca'nyej je'ej ti a'ín tyitaatá' ityájma.
¹⁹ A'íjna i tyaj jin jajchó've', ca'nyíjra'aj pu tatá'caa ti'ij quee tyi'tíj ta'itziitya'aj i tatzájta', a'yájna ti'ij i báarcuj a'íjna jitze tyúuca'nyej i tyapúusti' ta'cáatojvi. A'íjna i tyaj jin tyi'ijchó've' tajapua' pu je'ráma'can, huárita' a'íjna i cíixurij ti jé'ta' ja'cáavii, ²⁰ jo'tij i Jesús anaquéj jo'tyájrupid ti'ij tajapua' huatányuunyij, ajta a'íjna jin tye'entyájrupid ti'ij va'cán jin tyu'tyáhuire'en i Dios jimi jusén jime', a'yájna ti'ij ajta a'íjna i Melquisedec.

Jesús pu jéetze' va'cán jin tyi'tyéjvee quee a'íjna i Melquisedec

7 ¹ A'íjna i Melquisedec a'íi pu rey jin tyi'tyávaaca'aj a'íjma jimi i maj Salem já'chajca'aj, ajta va'cán jin tyi'tyávaaca'aj i Dios jimi. Ti'ij Abraham mupu já'ajvej ti'ij néijmi'caa antyimue'tij a'íjma i maj rey jin tyityatatyá'ca'aj, a'íi pu i Melquisedec ujó'mej ti'ij ij ja'antynájchaca' a'íjci i Abraham, aj pu'ij tyámua' tyeetyájtóo, ² aj pu'ij i Abraham tyaatá' tamuáamuata' pua'mácan ti a'íjna jitze ajtyáma'can i ti tyu'mué'tij jo'maj jo'nyó'sej. Ajta a'íjna i maj jin a'yan jatamuá'muaj tijin Melquisedec, a'yaa pu huatóomua'aj tijin, i rey ti tyámua' naa tyí'ijta, ajta a'íjna i ti rey jin tyi'tyéjvee a'ájna a Salem, a'yaa pu huatóomua'aj tijin, Rey ti tyámua' tyihua'cha'ij mej mij juxáahuaj ajo'cháatime'nyij. ³ Capu je'ej ámiteere' a'tíj ti táatajra', nusu a'tíj ti náanajra' pu'éen, capu ajta je'ej ámiteere' a'tíj ti jitze eeráma'can, nusu a'náj ti huanie'huaca', na'ríij a'náj ti huamu', a'íj pu jin, a'yaa cha'tána'aj tin huasé'rin ti'ij ajta i yójra' i Dios, i ti va'cán jin tyi'tyéjvee jusén jime'.

⁴ Ajta a'yájna, siata'aj tyámua' tyeeséj ti jéehua juxié'va'ca'aj a'íjna i Melquisedec, a'íj pu jin i Abraham tyaatá' a'chu tamuáamuata' pua'mácan, ti a'íjma jitze tye'ejtyáma'cantaca'aj i maj rey jin tyityatatyá'ca'aj i ti hua'antyimue'tij. ⁵ A'yájna ti'ij tyá'xaj i nyúucarij

Moisés ti jo'yú'xaca', a'íimaj i maj Leví jitze eeráma'can i maj majta tyi'táj jin tyityatatyíj i Dios jimi, a'yaa mu tyityaatóoci'puaj maj huo'táhuavii i tyeítyee tamuáamuata' pua'mácan i maj tyí'ijcha'ij, tyij majta hua' ihuáamuata' pué'een nusu majta i Abraham jitze eeráma'can mati'ij a'íimaj. ⁶Ajta a'íjna i Melquisedec, capu a'íjna jitze eeráma'cantaca'aj i Leví, a'íi pu ajta ja'ancuriáa' tamuáamuata' pua'mácan a'íjna jimi Abraham, je'ej ti i Dios tyi'táj jin tya'tóoraj a'íjna jimi i Abraham. A'yaa pu a'íjna jin i Melquisedec tyámua' tyeetyájtoo a'íjci i Abraham, ⁷ajta quee i'ríj ti a'táj a'yan tyaataxáj yee capu a'yan tyi'ja'yájna ti a'íin jéetze' va'cán jin tyi'tyéjvee i ti tyámua' tyihua'tá'caa. ⁸Ajta íyan i cháanacaj japua, a'íimaj i maj tya'ancuriáa'vej i ti tamuáamuata' tya'rá'asej a'íi mu pué'een i tyeítyee i maj cui'caa, ajta i yu'xarij jitze a'yaa pu tyá'xaj a'íjci i Melquisedec ti'ij i ti ooj júurij. ⁹A'yaa pu tyí'ri'ij tyaj a'yan tyaataxáj tijin a'íimaj i maj Leví jitze eeráma'can, i maj majta tya'ancuriáa'vej i ti tamuáamuata' tya'rá'asej, a'íi mu tyu'nájchitaca' a'íjna jimi i Melquisedec ti'ij a'íin tyaanájchi i Abraham, ¹⁰ji'nye ti'ij a'íjna i Melquisedec eerájraa ti'ij ja'antynájchej a'íjci i Abraham, a'íi mu meríj jitzán séjria'ca'aj i maj jitzán eerama'cáantaj muá'ju'un.

¹¹A'íimaj i maj Israel jitze ajtyáma'can a'íj mu ancuriáa' i nyúucarij a'íj ti jitze eeráma'can i Leví. Ajta ijíj, a'íimaj i maj va'cán jin tyityatatyá'ca'aj majta tyámua' eenye', capu juxié'va'caj ti síj huataséjre'en ti ajta va'cán jin tyi'tyéjvee, capu che' a'íj ti jitze eeráma'can i Aarón sulu a'íj ti jitze ajtyáma'can i Melquisedec.

¹²Ji'nye mati'ij seequéj jáaruuj i maj jin tyityatatyíj, a'yaa pu ajta tyúuxie've' maj seequéj jáa'uurej i nyúucarij i maj jin tyu'ta'íjtaj, ¹³ajta a'íjna i tavástará', i ti ja'xaj i yu'xarij jitze, séej pu tyeítyeera' jitze ajtyáma'can, i ti quee eexúj a'náj a'táj tyi'táj jin eerájraa ti'ij tyu'tyáhuire'en i Dios jimi. ¹⁴Ji'nye tyámua' tu tyá'mua'reej ti i tavástará' Judá jitze eeráma'can, ajta i Moisés capu a'náj tyi'táj huataxájtaca' a'íijma tyeítyeera' jitze ma'can, ti'ij huo'taxájtaca' i maj va'cán jin tyityetya'úuj muá'ju'un i Dios jimi.

¹⁵Ajta a'yan tyámua' naa tyé'miteere', tipua'aj a'íjna i ti huataséjre a'yan cha'tána'aj va'cán jin tyi'tyávaacaj ti'ij a'íjna i Melquisedec, ¹⁶ajta quee a'íjna jin tyi'tyávaaca'aj je'ej maj tyo'yú'xaca' a'íimaj i tyétyacaa i maj cui'caa, sulu a'íj pu jin tye'entyájrurij a'íjna jime' ti júurij ta'mej jusén jime'. ¹⁷Ji'nye a'yaa pu i Dios tyaataxájtaca' tijin:

Muáaj paj jusén jin va'cán tyi'tyaváaj puá'mej,
a'yájna ti'ij i Melquisedec.

¹⁸A'yaa pu'ij a'íjna i nyúucarij ti i Dios anaquéj jaatyájtoo a'íijma jimi i maj Israel jitze ajtyáma'can, capu juca'nyajca'aj a'íj pu jin quee tyi'táj je'ej tyu'tyáhuíi, ¹⁹ji'nye a'íjna i nyúucarij Moisés ti jaatyájtoo capu tyi'táj tyámua' huáruuj, a'íj tu jin séej jimi

tyi'ijchó've' i nyúucarij ti jéetze' tyámua' een, tyej tyij a'íjna jin ajtyáxiirej i Dios jimi.

²⁰Ajta i Dios a'íjna jin tya'tóoraj i junyúuca a jime'. Majta a'íimaj i maj va'cán jin tyitye'entyájrurij capu i Dios junyúuca tyu'tá' a'íjma jimi, ²¹ajta i tavástara', a'yaa pu a'íjna jin tye'entyájrurij i nyúucarij jime', ji'nye a'yaa pu tyá'xaj i yu'xarij jitze tijin:

Tavástara' pu arí a'yan tya'tóoratziiri',
a'íj pu jin quee juhuárita' huaré'mej.

Tavástara' pu va'cán jin tyi'tyaváaj ta'mej jusén jime'.

²²A'yaa pu'ij, Jesús pu a'íin pu'éen i tyaj jin jamua'reej ti jéetze' tyámua' een a'íjna i nyúucarij ti jájcuaj i Dios ti jin tya'tóoraj ityájma jimi. ²³A'íimaj i maj ará'tyeej va'cán jin tyí'huiiria'ca'aj i Dios jimi, mamuí'caaj, ji'nye a'íi mu cui'caria'aj, a'íj pu jin quee i'riitaca'aj maj jusén jin júurij, ²⁴ajta i Jesús a'íi pu jusén jin séejre', ajta i ti jin va'cán tyi'tyéjvee i Dios jimi capu a'náj antyipua'rij. ²⁵A'íj pu jin pújoorej ti hua' japua huatányuunyij a'íjma i maj ajtyáhuixij i Dios jimi a'íjna jitze ma'can i Jesús, ji'nye a'íi pu jusén jin júurij, ta'aj ij hua' japua huatányuunyij.

²⁶A'íj pu jin i Jesús a'íin pu'éen i ti va'cán jin tyi'tyéjvee i tajitzé juxie've'. A'íi pu ji'rénaya'aj séejre' i Dios jimi, ajta quee tyi'tíj ál'itzeere', capu je'ej pua'aj tyi'tyúucha'íij mati'íj i séecan i maj je'ej pua'aj tyí'tyesejre' i Dios jimi, ajta tajapuá já'sejre'. ²⁷Capu a'yan tyí'sejre' mati'íj i séecan i maj majta tyityetyu'uj i Dios jimi, i maj ya'muáatye e cui'caa mej mij huo'támu'vejritaj jujíme' majta je'ej a'íjma jime' i jutyéityeristyamua'. Ajta i Jesús, a'yaa pu séej na'aj tyu'tóomu'vejritaca' ta'aj ij jusén jin néijmi'caa huatyáhuire'en. ²⁸Ajta a'íjna i nyúucarij Moisés ti jaatyájtoo, a'íjma pu antyíhuooca'aj i tyeítyee mej mij va'cán jin tyu'tyáhuire'en i maj majta quee tyámua' éenye'ej i jutzájta', ajta a'íjna i nyúucarij i Dios ti jin tya'tóoraj, a'íj pu antyíhuo i juyój, ti tyámua' een jusén jime'.

Jesús pu a'íin pu'éen i ti va'cán jin tyi'tyéjvee u tajapuá

8 ¹Ajta i ti jéetze' juxie've' i tyaj jatyáxajta a'íi pu a'íin pu'éen ti síij va'cán jin tyi'tyéjvee i Dios jimi ti'ij tajapuá nyuuccaaj, ajta uja'ajcáayixij muáca'ta' i Dios, ²ajta va'cán jin tyi'tyéjvee u tyejúuj tzajta', a'íjna i ináamuaj ti tzáahuatyí'ra'aj jin já'sejre' i Dios jimi, tavástara' ti ja'ajtaahuaca' camu a'íimaj i tyeítyee.

³Néijmi'i i maj va'cán jin tyityetyu'uj, a'íj mu jin antyíhuaviihuaca' mej mij tyi'tíj tyu'tapuéjve'en majta tyu'támu'vejritaj, a'íj pu jin a'yan tyúuxie've' ti i Ciríistu' ajta tyi'tíj huatámu'vejritaj. ⁴Típua'aj a'íin a'yan huatávaacaj i cháanacaj japua, capu i'ríitacajche' ti va'cán jin tyu'tyáhuire'en i Dios jimi, ji'nye mu'ríj a'yan séejre' i maj a'íjci jin antyúumua'reej mej mij tyu'támu'vejritaca' majta tyu'tapuéjve'en

i Dios jimi, a'yájna tí'ij tyé'yu'si' a'íjna jitze i yu'xarij Moisés ti yan jaatyájtoo. ⁵Majta a'íimaj i maj va'cán jin tyí'huúire', a'yaa mu a'íjna jin tyityetyu'uj ti a'yan séejre' tí'ij quéenyi'istaria'ra' i jútye' ti já'sejre'. Tyajta a'yan tyá'mua'reej maj quéenyi'istarij pué'een i jútye' ti já'ma'can, ji'nye tí'ij i Moisés uhuatyóochej ti jaatyátaahuaj a'íjci i ináamuaj Dios pu a'yan tyaaté'exaa tíjin: “Pata'aj néijmi'i jin a'yan huárinyij, je'ej nyaj tyimuaataséjra a'ájna i jiríj japua.” ⁶Ajta i ti tajimí va'cán jin tyi'tyéjvee, a'íi pu ja'ancuriáa' ti a'íjna jin tyu'tyáhuúire'en i ti jéetze' jí'ren i Dios jimi, a'íi pu a'íin pué'een i ti tajapua' huatányuusij, ajta a'íjna jitze aróoca'nyej i ti jéetze' tyámua' een i Dios ti jin tya'tóoraj.

⁷Típua'aj a'íjna nyúucarij i ti jin anaquéej i Dios a'yan huaríj tyámua' éenya'cajche', capu a'yan tyuuxié'va'caj tí'ij ajtáhua'aj séej i nyúucarij huátyoonyij i ti jin tya'tóoratziij. ⁸Ajta i Dios a'yaa pu tyihuo'séj maj a'íimaj i tyeétyee quee tyámua' éenye'ej, a'íj pu jin a'yan tyu'taxájtaca' tíjin,

A'yaa pu tyí'xaj i tavástara' tíjin: A'yaa pu atyojooma'aj ta'mej, nyej nyij jájcuán i nyúucarij huo'tásij a'íijma i maj Israel jitze ajtyáma'can,

nyajta a'íijma i tyeétyeristyamua'me'en i Judá.

⁹A'íjna i nyúucarij, capu a'yan éenye'ej ta'mej tí'ij i nyaj huo'ta' i já'muahuasimua'ci'ij,

nyati'ij hua'naví'raj hua' muáca' jitze

nyahui'ráavi'tij a'ájna a Egipto,

majta a'íimaj camu a'yan huaríj je'ej nyaj tyihuo'ta'íj i nyúucarij jitze,

a'íj nu jin ahuojoohuá'xij, a'yaa pu tyí'xaj i tavástara'.

¹⁰A'íjna i nyúucarij i nyaj jin tya'tányarasij a'íijma jimi i maj Israel jitze ajtyáma'can,

tí'ij tye'entyipua'ren a'ájna xicáara' jitze,

a'íi pu a'íin pue'éenye'ej ta'mej, i ti jime' tavástara' a'yan tyí'xaj tíjin,

A'yaa nu tyeetyátoosij i nyenyúucaa hua'mua'tziira'aj jitze,

nyajta i hua'xiéjnyu'caa tzajta'.

Nyáaj nu hua' Dios pue'éenye'ej na'mej,

majta a'íimaj nyetyeétyeristyamua' mu pue'éenye'ej muá'ju'un.

¹¹Capu che' a'yan tyuuxié've'ej ta'mej maj séej jamuán majta séej, tyi'huóomua'tyej mej mij jáamua'tyij i tavástara',

ji'nye néijmi'i mu nyamua'tyáaj muá'ju'un,

tí'ij na'aj i ti jéetze' cíleen ajta i ti jéetze' vásti'.

¹²Nyáaj nu tyihuo'tú'uunyí'raj i maj jin je'ej pua'aj huaríj,

nyajta quee che' a'náj jo'támua'reerij i maj jin ootyá'itzee.

¹³Ti'ij i Dios a'yan tyá'xajta ti jájcuacan huatyátoosij i nyúucarij, a'yaa pu huatóomua'aj ti i nyúucarij arí mí'ma'can i ti anaquéj hua' jimi jaatyájtóo, ajta i ti arí mí'ma'can ti ajta quee che' tyi'tíj huiire', a'fi pu'ríj antyipua'rij.

A'íjna i ináamuaj ti a'yan séjria'ca'aj i cháanacaj japua

9 ¹Ajta a'íjna i nyúucarij ti anaquéj jaatyájtóo, a'yaa pu tyé'yu'si'huaca'aj je'ej maj huárinyij mej mij jaatyáanajche i Dios, a'íjna tzajta' i ináamuaj ti a'yan séjria'ca'aj i cháanacaj japua. ²Ajta i ináamuaj a'yaa pu ényee'ej ájtaavijhuaca' jé'ta' ootanámi'huaj, ajta i ta'nájcaj jitze a'yaa pu tya'rátyapuaaca'aj tijin jo'tij naa tyej'éen, jo'tij jo'tyávaaca'aj a'íjna i ti antyitáatime, ajta a'íjna i méesaj ti japuan anja'ajmuaanyica'aj i páan i Dios ti jimi huatyátuihuaca'. ³Ajta huárita' a'íjna jitze i cíixurij ti je'tyáa'sej, a'yaa pu tya'rátyapuaaca'aj tijin “Jo'tij i Dios huápu'íj tyámua' naa tyojo'ruuj”, ⁴a'áa pu ooroj jin ja'ajtaavijhuaca'aj i maj japuan tyu'támu'vejritaj cítzive'rij jime', ajta a'íjna i chí'ra'an ti ooroj néijmi'que' cámejri'huaca'aj. Ajta a'íjna tzajta' i chí'ra'an xá'rij pu iirácatyij ti ooroj jin taavijhuaca'aj i ti tzajta' uhuáaca'aj i cue'ráj i maj a'yan jatamuá'muatya'aj tijin maná, a'úu pu ajta je'ráca'tyii a'íjna i Aarón tyaxu' ti arí ajtanyáxi'ca'aj, ajta a'úun je'rámuaanyica'aj i tyetyéj ti jitzán á'yu'si'huaca'aj i nyúucarij Dios ti jin anaquéj tya'tóoraj. ⁵Ajta japuan a'íjci chí'ra'an a'áan mu hua'puaj já'sejria'ca'aj i maj tajapua' tyi'huire' i Dios jimi, a'fi mu ju' anáj jin ja'vá'najca'aj a'íjci i chí'ra'an i Dios. Ajta ijíj capu a'yan tyúuxie've' tyaj néijmi'i tyu'taxáj tyi'tíj ti tzajta' séejre'.

⁶Mati'ij tyámua' tyu'uuren, a'úu mu jo'tyáru'picha'aj muá'ju'un a'íjna tzajta' i ti a'nájca i ináamuaj, a'íimaj i maj va'cán jin tyi'huiria'ca'aj i Dios jimi, mej mij a'yan huárinyij je'ej maj tyi'tíj jin tyitye'entyúumua'reeriaca'aj. ⁷Ajta a'íjna jitze i ináamuaj ti je'tyáa'sej, síj pu'uj a'úun jo'tyáru'pij i ti va'cán jin tyi'tyéjvee, ajta séej na'aj a'úun jo'tyáru'pij séej nyinyi'ra'aj jitze, ajta ti'ij utyájrutyey, a'yaa pu tyúuxie've' ti a'íj hua'ásime'en i ya'muáatyeexuure', ti'ij jaatámu'vejritaj jujíme', ajta hua' jime' i tyeityee, i maj quee jamua'reerij mo'tyá'itzee i Dios jimi. ⁸A'yaa pu a'íjna jin i júuricama'ra' i Dios tyi'tamua'tyey ti a'yan huatóomua'aj tiquee xu tya'antácuun, tyej tyij utyájrutyey jo'tij i Dios já'sejre', ji'nye óoche' pu séejre' i síj i ináamuaj. ⁹Néijmi'i a'íjna a'fi pu a'íin pu'éen i huá'yi'raj ijíj maj huátyeytyee, ji'nye i maj a'yan tyá'astej a'íjci i yi'ráj, a'yaa mu tyi'puejve' majta tyi'mu'vejritaj i Dios jimi, ajta a'íjna capu tyámua' huá'uurej i hua'mua'tziira'aj jitze. ¹⁰Ji'nye a'fi pu tyi'pu'éen i maj jacua'caa majta i maj jaya'caa, na'ríj i maj jin huatyái'ihuaxi'in,

néijmi'i pu a'yan tyí'een je'ej maj jujíimua'aj tyéejtyoj, ajta quee tyi'tíj huiire' 'asta na'aj quee i Dios seequéj jáa'uurej.

¹¹ Ajta ijíij i Ciriístu' pu arí yatanyéj, ajta a'fin pué'een i ti va'cán jin tyi'tyéjvee i Dios jimi, ti'ij tyámua' tyitaatyátoonyij. Ajta jo'tíj a'fin tyejé'ijtaj jéetze' pu tyámua' tyí'een, ji'nye camu i tyeítýee ja'ajtaahuaca'. ¹² Ciriístu' pu a'úun jo'tyájruij, capu ti'ij a'fjna i chíiutyee xuure' huatámu'vejritaj, nusu i visáaru'uj, sulu juxúure' pu jin tyu'nájchitaca', hua' jitze ma'can i tyeítýee jusén jime', a'fjna jime' i maj jin ootyá'itzee i Dios jimi. ¹³ A'yaa pu tyi'ja'yájna ti tyí'huiiria'ca'aj a'fijma jimi i maj quee tyámua' een, maj a'yan jáa'uurej i Dios jimi, mej mij huo'tyá'iraxi'in a'fjna jime' i hua' xuure' i chíiutyee, majta i túuru'uj xuure', ajta i maj jacáraaxij i nasfira' i visáaru' i maj jaatyáatiej. ¹⁴ Ajta tipua'aj a'yan tyi'ja'yájntan, jéetze' pu'ij tyí'huiire' i xúuria'ra' i Ciriístu'. Ji'nye a'fj pu jitze ma'can i júuricama'ra' i Dios i Ciriístu' a'yan tyu'tóomu'vejritaca', ajta quee tyi'tíj jin a'itzéeria'aj jaatyáhuirej, a'yaa pu een jin huaríj, tyej tyij jaatapuá'citaj siaj já'astijre' a'fjci i yi'ráj tiquee tyi'tíj huiire', tyej tyij jaatyáhuire'en a'fjci i Dios ti júurij.

I nyúucarij ti jájcuan jin i Dios tya'tóoratziiri'

¹⁵ A'fj pu jin i Ciriístu' a'fin pué'een i ti tyá'xa'pui'intare' a'fjna jitze i nyúucarij ti jájcuaaj, ajta a'fjna jime' mej mij tya'ancuriáan i ti tyihuá'ci'tyij jájcuan jime', ji'nye Ciriístu' pu huamuí', a'fj pu jin tyihuo'tú'uunyi'ri' i maj jin ootyá'itzee i Dios jimi, a'yaa pu'ij tyí'rij mej mij a'fijmaj i Dios ti huo'tajé tya'ancuriáan je'ej ti tyi'tíj tyihua'táratziiri'. ¹⁶ Ajta ta'aj ij i yu'xarij tyu'ta'íjtaj, i ti jin a'tíj tya'tóoraj, a'yaa pu tyúuxie've' ti a'fjna i a'tíj anaquéej huámu'nyij ti'ij séej tyú'ci'tyij je'ej ti tyé'yu'si' i yu'xarij jitze. ¹⁷ Ji'nye a'fjna i yu'xarij capu tyi'tíj huiire' tipua'aj ooj júurij a'fjna i a'tíj ti a'fjci jin tya'tóoraj, sulu tipua'aj arí huámu'nyij aj pu'ij séej a'tíj tyí'ci'tyij je'ej ti tyé'yu'si' i yu'xarij jitze. ¹⁸ A'fj pu jin, a'fjna i nyúucarij ti Dios anaquéej jin tya'tóoratziiri', a'yaa pu ajta tyu'tóoxie'vej maj je'ráxire'en i ya'muáatyee xuure'. ¹⁹ Moisés pu a'yan tyihuo'tánamuajrastej néijmi'caa i tyeítýee, je'ej ti tyé'yu'si'huaca'aj a'fjna jitze i yu'xarij i maj jin tyí'ijta'ca'aj, aj pu'ij té'ej a'fj tyi'á'aj i muxáj ti po'vij ajta i hisoopoj pi'istáa, ti'quij jaatyáaru'nyej i visáaru' xuure' jime' ajta i chíiutyee xuure' jamuán i jájtyij, aj pu'ij a'fjna jaatyá'iraxij i yu'xarij ti jiri', ajta huo'tyá'iraxij néijmi'caa i tyeítýee. ²⁰ Aj pu'ij a'yan tyihuo'té'exaaj tijin: "A'fi pu a'fin pué'een i xúure'ej ti jin Dios a'yan tyaaxá'pui'intarej mua'ajmaj jimi." ²¹ Moisés pu ajta a'yan tyeetyá'iraxij i xúure'ej jime' a'fjci i ináamuaj, ajta néijmi'i i ti a'úun tyi'ráa'ca'aj u ináamuaj tzajta'. ²² Ajta a'fjna jitze i yu'xarij i maj jin tyi'ijta, a'yaa pu tyá'xaj tiquee je'ej tyi'rij ti

tyihuo'tú'uunyi' i tyeétyee i maj jin ootyá'itzee i Dios jimi, tipua'aj mequee huo'tyá'íiraxi'in i xúure'ej jime', nusu mequee je'ráxire'en ya'muáatyee xuure'.

I mu'vérij ti jéetze' tyámua' een i Dios jimi

²³ A'íj pu jin a'yan tyi'huóoxie'va'ca'aj maj a'yan tyityeetyá'i'huaxi'in mej mij tyu'jácuare'en a'íjci i ti a'yan tyí'sejria'ca'aj tí'íj quéenyi'istaria'ra' a'íjci i ti jútye' tyejé'sejre', ajta a'íjna i ti jútye' tyejé'sejre' jéetze' pu tyámua' tyí'een, quee i maj a'yan tyí'mu'vejritaca i cháanacaj japua. ²⁴ Ji'nye i Círíistu' capu a'úun jo'tyájrurij i ináamuaj tzajta' i tyeétyee maj ja'ajtaahuaca', ti ajta a'yan een tí'íj quéenyi'istaria'ra' a'íjci i ti jútye' já'sejre', sulu tajapuá pu jo'tyájrurij i Dios jimi ta'aj ij tajapuá huatányuunij. ²⁵ Capu ajta a'íjna jin utyájrurij tí'íj mue'tíj huatóomu'vejritaj, a'yájna tí'íj i ti va'cán jin tyí'huíire' íyan i cháanacaj japua, i ti séej na'aj utyáru'pij séej nyinyi'ra'aj jítze, jo'tíj tyámua' tyejé'een ta'aj ij huatyá'i'huaxi'in i xúure'ej jime' tiquee jusíj je'ráxirej. ²⁶ Tipua'aj a'yan tyi'ja'yájnatan, a'yaa pu tyuuxié'va'caj ti i Círíistu' mue'tíj huámu'nyij tí'íj na'aj tyu'séjrej i cháanacaj. Ajta íjij tí'íj arí néijmi'i tye'entyipua'rij, Círíistu' pu séej na'aj a'yan tyu'taséjre ajta jusén jin séejre', a'yaa pu jusíj tyu'tóomu'vejritaca' ta'aj ij tyihuo'tú'uunyi' i maj jin ootyá'itzeerej i Dios jimi. ²⁷ A'yájna tí'íj ajta néijmi'caa i tyeétyee tyihuá'ci'tyij maj séej huácu'nyij ajta je'en a'yan tyihuá'ci'tyij ti i Dios huo'xíjtye'en, ²⁸ a'yaa pu ajta i Círíistu' séej na'aj tyu'tóomu'vejritaca' hua' jítze ma'can i tyeétyee, tí'íj tyihuo'tú'uunyi' i maj jin ootyá'itzee i Dios jimi. Tí'quíj ajtáhua'aj huataséjre'sij, capu che' puéjtij huo'tá'sij a'íjci jime' i maj ootyá'itzee, sulu a'íi pu hui'rátóosij i maj jajchó've'.

10 ¹ Ji'nye a'íjna i nyúucarij i maj jin tyí'íjta Moisés ti yan jaatyájto, a'yaa pu éenye'ej tí'íj quéenyi'istaria'ra' i ti xá'pui' ti yaja've'mej, capu a'íin pu'éen i ti ji'r'é'can jime'. A'íj pu jin quee je'ej tyí'rij ti i nyúucarij tyámua' huó'uurej a'íjma i maj ajtyáxíirij i Dios jimi mej mij séej tyu'támu'vejritaj séej nyinyi'ra'aj jítze. ² Ji'nye tipua'aj a'íjna i nyúucarij tyihuo'tú'uunyi'rajche' i maj jin ootyá'itzee i Dios jimi, camu che' a'yan tyo'tamua'reéerejche' tyi'tíj maj jin ootyá'itzee, majta jaatapuá'citajche' maj tyí'mu'vejritaj. ³ Ajta a'íjna i maj tyí'mu'vejritaj a'yaa pu'uj tyí'huíire' mej mij a'íjci jin jo'támua'reej tí'íj na'aj séej nyinyi'ra'aj jítze i maj jin ootyá'itzee i Dios jimi. ⁴ Ji'nye i hua' xuure' i túuru'uj ajta i chíutyee capu í'rij tí'íj a'íjna jin i Dios tyihuo'tú'uunyi' i maj jimi ootyá'itzee. ⁵ A'íj pu jin i Círíistu' tí'íj a'yan huataséjre i cháanacaj japua, a'yaa pu tyaaté'exaa i Dios tijin:

Capáj jaxie've' maj tyu'támu'vejritaj, nusu maj tyi'tíj tyu'tátuire'en muéetzij jimi,

sulu a'yaa paj muáaj tyinaatá' i nyaj jatyhue'ra'.

⁶ Capu mua'ráanajchij maj ya'muáatyee mu'vejritaj muéetzij jimi i maj huá'teeraj, nusu maj tyu'tátuire'en muéetzij jimi a'fjna jime' i maj jin ootyá'itzee.

⁷ Aj nu nyij a'yan tyu'taxájtaca' tijin:

“Yá'nyaj huatyéjve, a'yájna ti'ij nye jimi tyé'yu'si' i yu'xarij jitze, a'fj nu jin mujo've'mej nyej nyij

a'yan huárinyij je'ej paj muáaj tyá'xie've', Dios paj pu'éen.”

⁸ A'yaa pu anaquéj tyu'taxájtaca', ti i Dios quee jaxie've' ajta quee ja'ráanajchi maj jimi tyí'mu'vejritaj, na'ríij maj jimi tyí'tuiiria'aj i ya'muáatyee i maj huo'tyáatiej, ti'ij a'fjna jin tyihuo'tú'uunyi' i maj jin ootyá'itzee, tyij ajta a'yan tyihuo'ta'fj a'fjna i nyúucarij i maj jin tyí'ijta. ⁹ Ajta je'en a'yan tyu'taxájtaca' tijin: “A'fj nu jin mujo've'mej nyej nyij a'yan huárinyij je'ej paj muáaj tyá'xie've'.” A'yaa pu'ij huatóomua'aj ti a'fjin arí jo'rio'uj i nyúucarij ti anaquéj huatyátuihuaca', ajta je'en séej huatyájto i nyúucarij ti jájcuaj. ¹⁰ Dios pu tyámua' táaruuj, ji'nye Ciríistu' pu a'yan huarfj je'ej ti i Dios tyá'xie'va'ca'aj, a'fjna jime' ti séej na'aj huatóomu'vejritaca' ajta jusén jin a'yan éenye'ej ja'mej.

¹¹ Néijmi'i i maj va'cán jin tyityatatyij i Dios jimi, a'yaa mu a'náj tina'aj tyí'huüre', majta a'náj tina'aj tyí'mu'vejritaj, ajta a'fjna capu a'náj tyihuo'tú'uunyi'raj i maj jin ootyá'itzee i Dios jimi. ¹² Ajta i Ciríistu', a'yaa pu séej na'aj tyu'támu'vejritaca' ti'ij tyihuo'tú'uunyi' jusén jime' i maj jin ootyá'itzee i Dios jimi, ajta je'en uja'ajcáayixij muáca'ta' i Dios. ¹³ A'áa pu'ij tyí'cho've' 'asta na'aj quee Dios hua'antymue'tin néijmi'caa i maj jájcha'üre', ¹⁴ ji'nye séej pu jin i mu'vejrij tyámua' huó'ruuj jusén jime' a'fjma i Dios maj jimi ajtyu'uj.

¹⁵ Ajta i júuricama'ra' i Dios, a'yaa pu cha'tána'aj tyí'ta'ixaatyee' tijin:

¹⁶ A'fjna i nyúucarij i nyaj jin tya'tányaratziiri' hua' jimi ti'ij tya'náara'an a'fjna xicáara' jitze.

A'íi pu a'fjin pue'éenye'ej ta'mej i ti tavástara' a'yan tyá'xaj tijin: “Nyahuo'tá'sij i nyenyúuca hua'xiéjnyu'caa tzajta”,

nyajta jaatyátoosij i hua'mua'tziira'aj jitze.

¹⁷ Nyajta quee che' jo'támua'reerij i maj jin ootyá'itzee, nusu i maj jin je'ej pua'aj huarfj.

¹⁸ A'yaa pu'ij, capu juxie've' maj tyí'mu'vejritaj, ji'nye Dios pu arí tyihuo'tú'uunyi'ri' i maj jin ootyá'itzee.

Tyiche' tyámua' tyí'tyesejre'ej i Dios jimi

¹⁹ Nye'ihuáamua', a'yaa pu ijíij tyitatá'caa tyej tyij taxáahuaj utyájrutyey u tyejúuj tzajta', a'fjna jime' ti i Jesús je'ráaxirej i juxúure' tajitzé ma'can, ²⁰ a'yaa tu a'fjna jitze tyityaajú' i juyéj ti jájcuaj, tyej

tyij a'úun jo'tyájrutyey jo'tij je'cáahuí a'ájna i cáanarij ti nyéeri'ij, a'ájna i cáanarij ti nyéeri'ij, a'í pu a'ín pué'een i tyévira' i Jesús. ²¹A'yaa tu tyá'mua'reej ti a'ín va'cán jin tyí'huíire' tajitzé ma'can a'ájna jo'tij i Dios tyejé'ijtaj. ²²A'íj pu jin, tyiche' ajtyáxiirej i Dios jimi, tzáahuatyí'ra'aj jime' tyajta tyámua' éenye'ej i tatzájta', tyajta ji'r'é'can jime' tyá'tzaahuatyey'ej ti a'yan tyí'ja'yájna ti i Dios tyámua' tyitaatá'sij a'ájna jime' ti i Ciríistu' arí tyámua' táaruuj i taxiéjnyu'caa tzajta', a'ájna jime' tyaj huái'huaca' i jájtyij jime' ti jí're'en. ²³Tyiche' tyámua' eenye', tyajta quee tyí'táj jin á'itzeeria'aj, a'ájna jitze i tyaj jitzán tyá'tzaahuatyey' tyajta jitzán tyí'ijchó've'ej a'ájna i tyaj huá'ixaatyey' i tyeítyee, ji'nye Dios pu a'yan rinyij je'ej ti arí tya'tóoraj ityájma jimi. ²⁴Tyiche' jáahuonyij tyej tyij ca'nyíjra'aj huatáta'an séej jamuán tyajta séej, tyej tyij jéetze' huátaxie've'en, tyajta xá'pui' huárinyij. ²⁵Tyiche' quee atyá'ítze'rihua'an jo'tyaj já'tasi'rii, matí'ij séecan ricij, sulu tyiche' jéetze' ca'nyíjra'aj huatáta'an séej jamuán tyajta séej, tyej tyij tyámua' eenye', ji'nye pu'ríj a'ájna atyojo'r'é'nyesij a'ájna xicáara' jitze ti tavástara' yan huataséjre'sij.

²⁶Ji'nye tipua'aj taxié'vi'ra' jin tyooj je'ej pua'aj tyí'tyítacha'íij a'yan tyetya'mua'rériaj tiquee xá'pui', capu che' mu'véjrij séejre' i ti jin i Dios tyitaatú'uunyí', ²⁷a'í pu'quij taci'tyij i ti tzíinyi're', ajta puéjtzij ti a'yan séejre' ti'ij tiéj i ti Dios huo'tá'sij néijmi'caa a'ájma i maj jájcha'iire'. ²⁸Tipua'aj a'táj quee jaatyáxaahuataj a'ájci i nyúucarij Moisés ti jo'yú'xaca', majta hua'puaj, na'ríij maj huéicaj a'yan metyí'sej ti i a'táj tyí'táj jin ootyá'ítzee a'ájci jitze i nyúucarij i maj jin tyí'ijta, a'yaa mu quee tya'cu'váaj méejecatán. ²⁹Ajta jéetze' pu puéjtzij huá'ci'tyij a'ájma i maj jaatyáxaahuataj a'ájci i yójra' i Dios, majta i xúure'ej ti jin tyu'xá'pui'íntarej a'ájna i nyúucarij Dios ti jin tya'tóoratiiri', majta je'ej pua'aj tyá'xaj i júuricama'ra' i Dios. ³⁰A'yaa tu tyá'mua'reej, ti i tavástara' a'yan tyu'taxájtaca' tijin: "A'yaa pu nyéetzij tyí'nyaci'puaj nyej nyij tyo'xá'pui'íntare'en, nyáaj nu tyí'najchitan." A'yaa pu ajta tyu'taxájtaca' tijin: "Tavástara' pu huá'xijtye'en i jutyétyeristyamua'." ³¹Jéehua pu huá'pui'ij tzíinyi're' ti i Dios ti júurij jo'xájtaye'en i a'táj ti je'ej pua'aj tyí'tyúucha'íij jimí.

³²Siata'aj jo'támua'reej je'ej ti tyí'eenye'ej a'ájna ímuáj, siati'íj anaquéej ja'ancuriáa' i nyúucaria'ra' i tavástara', a'yaa xu néijmi'i tyityo'viicue'rej i sij jin jajpuéjtzica'aj. ³³Je'cáj mu je'ej pua'aj tyajamuaatajé, majta séecan ca'nyíjra'aj huo'ta' a'íimaj i maj a'yan cha'taj mana'aj tya'ajpuéjtzica'aj, ji'nye néijmi'i xu ju'ihuámua'. ³⁴Mua'aj xu hua'ancu'vaxi a'íimaj i maj eetyánami'huaca'aj, sijta jutyamua've'ej setyu'tátoj i sij tyí'ijcha'íica'aj, ji'nye a'yaa xu tyá'mua'reerica'aj sij jéehua tya'ancuriáa'sij i Dios jimi, a'ájna ti tyajámua'a'rij ti jéetze' tyámua' tyí'een ajta jusén jin tyí'sejre'. ³⁵A'íj xu jin quee yó'hua'nán i sij jitzán tyí'ca'nyej, ji'nye jéehua xu

tya'ancuriáa'sij. ³⁶A'yaa pu ja'mua jitze tyúuxie've' siaj tyo'táviicue' i siaj jin jajpuéjtzij, siaj sij a'yan huárinyij je'ej ti i Dios tyá'xie've' ajta je'en tyajamuáaci'tyij i ti ja'mua jimi tyá'tóoraj. ³⁷Ji'nye a'yaa pu tyá'xaj i yu'xarij jitze tijn:

Jiye'tzín jime', ca'nácan,
pu a'yan huataséjre'sij, a'íjna ti yaja've'mej.
Capu che' á'tyeeren.

³⁸A'íjna i ti tyámua' tyi'tyúucha'ij
a'íi pu jahuiire'en i ti jitzán tyá'tzaahuatye',
ajta tipua'aj jaatyáxaahuataj i ti jitzán tyá'tzaahuatye',
canu che' nyetyámua've'ej na'mej a'íjci jimi.

³⁹Tyajta ityáj catu hua' jitze ajtyáma'can i maj jaatyáxaahuataca' i nyúucaria'ra' i Dios, majta je'en a'íjna jin antyipua'rij, sulu ityáj tu hua' jitze ajtyáma'can i maj tyá'tzaahuatye', ji'nye a'íjma pu huiire'en.

I maj jin tyá'tzaahuatye'

11 ¹A'íjna i tyaj jin tyá'tzaahuatye' a'yaa pu huatóomua'aj tyej tyámua' naa tyá'mua'reerej i tyaj jajchó've'ej, tyajta a'yan tyá'mua'reerej ti a'yan tyi'ja'yájna i tyaj quee jaaséj. ²A'íimaj i tahuásimua'ci'ij, a'yaa mu néijmi'i jin tyu'tyáamue'tij, ji'nye a'íi mu tyá'tzaahuatya'ca'aj.

³A'íjna i tyaj jin tyá'tzaahuatye', a'íj tu jin jamua'reej ti Dios néijmi'i tyú'taahuaca' ijíij ti tyí'sejre', a'íjna jime' ti a'yan tyu'taxájtaca', a'yaa pu'ij ijíij tyaj tyí'sej, a'yaa pu tyu'séjrej je'ej ti quee tyí'sejria'ca'aj.

⁴A'íjna i ti jin tyá'antzaahuaj i Abel, a'íj pu jin tyámua' eenye' jéetze' tyu'támu'vejritaca' i Dios jimi quee a'íjna i Caín, a'íj pu jin Dios a'yan tyaataxájtaca' ti i Abel tyámua' éenye'ej ajta je'en ja'ancuriáa' i ti jin tyu'támu'vejritaca'. A'yaa pu'ij, tyij ajta i Abel arí huamuí', óoche' pu tyí'ta'ixaatye' a'íjna jime' i ti jin tyá'antzaahuaj.

⁵A'íjna i ti jin tyá'antzaahuaj i Enoc, Dios pu a'íjna jin yo'ví'tij júurican ti'ij quee huámu'i'nyij, a'íj mu jin quee che' jáatyoy, ji'nye Dios pu yo'ví'tij. Ajta a'yan tyá'xaj i yu'xarij jitze tijn ti'ij quee xu yo'ví'tíicaria'caj, Enoc pu tyámua' tyi'tyúucha'íica'aj i Dios jimi. ⁶Ajta capu je'ej tyí'rij ti a'tíj tyámua' tyí'sejria'aj i Dios jimi, tipua'aj quee tyá'tzaahuatye'ej, ji'nye tipua'aj jaxie'va'aj ti ajtyáxiirej i Dios jimi, a'yaa pu tyúuxie've' ti a'íin tyá'antzaahuatye'en ti i Dios séejre', ti ajta a'íin tyámua' tyihua'tá'caa a'íjma i maj jahuoo.

⁷A'íi pu ajta tyá'antzaahuaj a'íjna i Noé, ti'ij i Dios a'yan tyaaté'exaa ti a'yan tye'mej je'ej ti quee xu tyi'tíj tyí'sejraca'aj, a'íj pu jin ja'rá'astej ti'ij ij jaatyátaahuaca' i canúhuaj ti ve'ej, ta'aj ij huo'tyáhuire'en i jutyéityeristyamua'. A'íjci jime' i ti jin

tyá'antzaahuaj, Noé pu huo'té'exaa néijmi'caa i tyeítýee i maj a'yan séejre' i cháanacaj japua maj quee xá'pui' ricij i Dios jimi, ajta a'yan tyaací'ij ti'ij ji'réenya'aj huatyá'itzeere'en i Dios jimi, a'íjna jime' i ti tyá'antzaahuaj.

⁸A'yaa pu cha'taj tyá'antzaahuaj a'íjna i Abraham, ti'ij i Dios jaatajé, a'yaa pu tya'rá'astijre ti'ij ij jó'raa a'ájna i chuéj japua jo'tij yá'ci'puaj. A'íi pu quee jamua'reeriaca'aj jo'tij jó'yi'caaj ti'ij iirájraa jo'tij já'chajca'aj, ⁹a'íjna jime' i ti tyá'tzaahuatya'ca'aj a'áa pu jó'catyii jo'tij quee já'ma'can, a'íjna séej chuéj japua jo'tij i Dios a'yan tyaja'tóoraj ti jaci'tyij. A'áa pu jó'catyii navíj chi'ra'an tzajta', a'yájna ti'ij ajta i Isaac, ajta a'íjna i Jacob, i maj majta a'yan tya'ancuriáa' je'ej ti i Dios tya'tóoraj hua' jime'. ¹⁰Ji'nye Abraham pu a'yan tye'ejchó'va'ca'aj ti a'áa jo'tyájrutyey i chájta'naj jitze tiquee a'tíj a'náj jaatyú'uunaj a'íjna jime' ti i Dios jáasiimuaj ti'ij ij ja'ajtaahuaca'.

¹¹A'yaa pu ajta tyá'antzaahuaj a'íjna i Sara, a'íj pu jin i Dios a'yan tyaatá' ti pá'ri'ij jitzán huataséjre'en, ajta arí huápui'ij ucarístaca'aj, ajta i Abraham pu'ríj ajta vastacirie'ca'aj, a'yaa pu tyaací'ij ti tyiyóoj já'ra'nyij, ji'nye a'íi pu tyá'antzaahuaj ti i Dios a'yan tya'róo'astej je'ej ti hua' jimi tya'tóoraj. ¹²A'íj pu jin i Abraham, tyij ajta arí tin mu'i'nyíche', a'yaa mu mue'tíj jitzán tyitye'rama'cáantaj muá'raa i yójmua'mua' mati'ij i xú'ra'vetyee, nusu ti'ij i séj ti a'áa ja'ajtyájcay jo'tij i jájtyij ja'va'ástimee i tiquee i'ríj ti a'tíj jaatyé'iten.

¹³Néijmi'i mu i tyeítýee huácuij mequee xu tya'ancuria'aj je'ej ti i Dios tyihua'táratziiri', ajta a'íimaj mu tyá'antzaahuaj, a'íj mu jin tyu'séj a' imuáj mo'tyu'úuj majta huatatyójtaca' a'yan metya'mua'rériaj maj quee hua' jitze ajtyáma'cantaca'aj a'íimaj i maj íiyan huacháatimee i cháanacaj japua. ¹⁴Majta a'íimaj i maj a'yan tyí'xaj, a'yaa mu huatóomua'aj tijin móoche' mu jáahuosij i chuéj jo'maj jo'rá'sej. ¹⁵Tipua'aj a'íimaj a'yan metyá'mua'ajcaj i chuéj jo'maj ja'ráacij, a'yaa pu tyi'ríitacaj maj huariá'ciinyejche'en jo'maj ja'ráacij, ¹⁶majta a'íimaj a'yaa mu tyá'xie'va'ca'aj maj a'áa jo'rá'sej jo'tij jéetze' tyámua' tyejé'een, a'yaa ti'ij huatóomua'aj, a'íjna i tajapúa ti já'sejre'. A'íj pu jin quee i Dios jatyevi'raste' maj a'yan jaatámua'tyij tijin hua' Dios, ji'nye a'íi pu arí tyámua' jáaruuj séej i chájta'naj jo'maj jo'tya'aj muá'ju'un jusén jime'.

¹⁷A'yaa pu i Abraham tyá'antzaahuaj, ti'ij i Dios a'yan tyaatatyésej, a'íi pu yo'ví'tij a'íjci i juyój Isaac ti'ij jaatámu'vejritaj. A'yaa pu tyóoca'nyajca'aj ti i juyój huatámu'vejritaj, tyij ajta a'íj na'aj caa tyi'ijyójcacaj, i ti jitzán i Dios a'yan tya'tóoraj tijin:

¹⁸“A'íjna jitze ma'can mu i Isaac néijmi'i eerányesij i maj muéetzij jitze eerama'cáantaj muá'ju'un.” ¹⁹A'yaa pu a'íjna i Abraham tyámua' tyá'mua'reeriaca'aj ti i Dios néijmi'i putyí'uurej, ti ajta huo'tájuuritye'en a'íimaj i maj meríj huácuij, a'íj pu jin i Abraham

júurican jo'ví'tij i juyó, a'yaa pu'ij a'fín s'ij tyi'pué'een i tyaj jitzán tzáahuatyira'aj tyícha'íj.

²⁰A'yaa pu ajta tyá'antzaahuaj a'fjna i Isaac, ti'ij jaatáhuaviiri' i Dios ti'ij a'fín tyámua' tyihuo'tyátoonyij a'fjci i Jacob, ajta a'fjci i Esaú. ²¹A'yaa pu tyá'antzaahuaj a'fjna i Jacob, a'fj pu jin ti'ij arí á'me'riajca'aj, a'fi pu ecóotutaca' i jutyáxu' japua ti'ij jaatyáanajche i Dios, ajta je'en a'fjna jin tyámua' tyihuo'tyájtooo séej ajta séej i yójmua'mua' a'fjci i José. ²²A'yaa pu tyá'antzaahuaj a'fjna i José, a'fj pu jin ti'ij arí á'me'riajca'aj a'yaa pu tyu'taxájtaca' maj eeráaju'un a'fímaj i maj Israel jitze ajtyáma'can a'ájna a Egipto, ajta pu huo'ta'fj jo'maj ya'vá'naj i tyévira'.

²³A'fjna i maj jin tyá'antzaahuaj i huásimua'mua' i Moisés, a'fj mu jin huéecaj máxcirie' jaatyá'avaataca' ti'ij huanie'huaca', jil'nye a'yaa mu tyé'sejraca'aj ti naa huasé'rihua'aj a'fjna i pá'ri'íj, majta quee tyí'tziinya'ca'aj a'fjna jime' je'ej ti tyu'ta'fjtaca' a'fjna i rey, mej mij huó'cui'nyij i ti'ríj maj tyétyaca.

²⁴A'yaa pu ajta tyá'antzaahuaj a'fjna i Moisés, a'fj pu jin ti'ij arí vastaca'aj, capu a'yan tyá'xie'va'ca'aj maj a'yan jaatámua'tyij yee yójra' pu pué'een a'fjci i íitaj i rey ti jajyó, ²⁵a'yaa pu tya'ránajchaca' ti jaapuéjtzitarej hua' jamuán i maj tyeítyeristyamua' pué'een i Dios, capu a'yan tya'ránajchaca' ti a'fjna jin huóotyamua've'en i ti je'ej pua'aj een i Dios jimi. ²⁶A'yaa pu tyámua' tyá'mua'reeriaca'aj ti jéetze' jatyáhu'i'rihua'aj maj jaatyáxaahuataj i Ciríistu' jitze ma'can, quee ti a'fjna jin huóotyamua've'en i ti huápu'íj tyá'najchij a'áa ti tyajá'ma'can a Egipto, jil'nye a'fj pu tyicho'va'ca'aj i ti tyá'ci'tyij i Dios ti tyaata'sij. ²⁷Moisés pu tyá'antzaahuaj, a'fj pu jin eerájraa a Egipto, ajta quee jatziinya'ca'aj tipua'aj tyinyú'caj a'fjna i rey, a'yaa pu tyámua' eenye' je'ej ti tyi'tfj jin tya'tóoraj, cuxáa ja'séjraca'aj a'fjna i Dios tiquee séejre'.

²⁸A'fjna jime' ti tyá'antzaahuaj a'fjna i Moisés, a'fj pu jin a'yan tyeeeye'estej a'fjna xicáara' ti jitzán Dios tyihuo'tú'uunyiri', ajta a'yan tyu'ta'fjtaca' maj ja'ajtyáputyijraxi'in i xúure'ej i puéertaj jitze, ta'aj ij quee a'yan tyihuó'ci'tyij maj huá'cui'nyij i hua'yojmua' i maj anáatya'aj muaanánie'huaca' a'fijma i Israel jitze ajtyáma'can. ²⁹A'fjna jime' i maj tyá'antzaahuaj i maj Israel jitze ajtyáma'can, a'fj mu jin antacj i jáytyij japua ti ve'éj ti a'yan tyaja'rájtyapuaj tijin jáytyij ti po'vij, a'yaa mu japuan tyitya'antacj ti'ij jo'tij jo'huáchij, majta a'fímaj i maj Egipto já'ma'cantaca'aj, mati'ij jaataxié'vej maj a'yan cha'taj mana'aj huárinyij, a'fi mu atyájcuii.

³⁰A'yaa mu majta tyá'antzaahuaj i maj Israel jitze ajtyáma'can, a'fj pu jin mati'ij aráahua'puaj xicáj eetyácij i chájta'naj jitze, aj pu'ij eetávej i tyetyéj ti jin ájtaavijhuaca', i ti jin curiá'nami'huaca'aj a'fjna i chájta'naj Jericó. ³¹A'yaa pu ajta tyá'antzaahuaj a'fjna i Rahab, a'fjna i íiti' ti huá'jijva'ca'aj i maj jamuán jil'pitya'aj, a'fi pu quee huamu'f

hua' jamuán i maj quee ja'rá'astijrej i Dios, ji'nye a'fi pu tyámua' tyihuo'tyéje a'fimaj i maj ixie'ria'ca'aj.

³² ¿Tyi'tanyí nyajtáhua'aj huata'xájtaj? Móoche' mu á'itzeere' i nyaj huo'taxáj je'ej ti huaríj a'fjna i Gedeón, ajta i Barac, ajta a'fjna i Sansón, ajta i Jefté, ajta a'fjna i David, ajta a'fjna i Samuel, majta a'fimaj i maj Dios jitze ma'can tyí'xajtaca'aj. ³³ A'fj mu jin i maj tyá'antzaahuaj huo'mué'tij a'fjma i maj tyityatatyá'ca'aj i séej chuéj japua, tyámua' mu tyu'ta'íjtaca', majta tya'ancuriáa' i Dios ti jin hua' jimi tya'tóoratziiri', majta hua'ancáanaxij hua' tyenyij jitze i muajyéj, ³⁴ majta jo'jé'caj i tiéj ti'ij quee huo'tyátieeraj, séecan mu huatóo'uj mej mij quee huó'cui'nyij i náhuaaj jime', a'fi mu huatyóoca'an i maj quee uhuácaca'nye'ej, mati'ij mij tyu'mué'tij i maj huanyo'sej, a'fjma jimi i maj séej chuéj japua já'ma'cantaca'aj. ³⁵ Séecan mu majta i úucaá júurican huaséj i jutyéityeristyamua' i maj meríj huácui'ijcaá.

Majta séecan huápu'íj jaapuéjtzitariaca', majta quee jaataxié'vej maj hui'rátoonyij, ji'nye a'yaa mu tye'ejchó'va'ca'aj maj a'fjna jin huatájuurej i maj i jusén jin júurij muá'ra'nyij. ³⁶ Majta séecan a'fjna jin jaapuéjtzitariaca' i maj je'ej pua'aj tyihuá'jeevaca'aj, nusu i maj huo'tyáavaxij, majta hua'náji'ca'xij cadéenaj jime', na'ríj maj hue'tyáanaj. ³⁷ Séecan mu huácuij i maj huo'tyáto'sixij tyetyéj jime', majta je'cácaá huatyéveechixij, majta huo'cuij chúun jime' ti juxa'aj tya'antámuamuaa, a'yaa mu metyityojo'jujhua'nya'aj méyee majta méyee, a'fjna metyi'cháaj i huá'navij i cánya'xii nusu i chíiutyee, camu je'ej tyéejviicue'raca'aj, jéehua mu jajpuéjtzica'aj, majta je'ej pua'aj huá'uuriajca'aj. ³⁸ A'fimaj i tyétyacaá, tiquee a'yan tyihua'tyévijtya'ca'aj maj a'yan huacháatime'nyij i cháanacaj japua, a'yaa mu metyityojo'jujhua'nya'aj, jo'tij quee já'tyi'tij, majta jo'tij jíríj jo'quéetimee, nusu jo'tij já'tyasta'ca'aj, majta jo'tij jo'ojcúunyijmee íiyan i cháanacaj japua. ³⁹ Majta a'fimaj, camu meexu tya'ancuriáa' i Dios ti jin hua' jimi tya'tóoraj, majta tyámua' tyi'tyeséere'ej muá'raa a'fjna jime' i maj tyá'antzaahuaj, ⁴⁰ a'fj pu jin i Dios a'yan tyitaaxá'pu'íntari'ri' ityájma a'fjna i ti jéetze' tyámua' tyí'leen mej mij a'fimaj tajamuán tyámua' éenye'ej muá'ra'nyij.

Tyiche' a'fjna jitze rányejnye'rej i Jesús

12 ¹ A'yaa pu'ij, ityáj tu jéehua hua'sej i tye'ityee i maj majta a'yan tyá'tzaahuatye', tyiche' tyu'táxaahuataj a'fjna i ti tyí'ta'ítziitye', tyajta jaatapuá'citaj a'fjna i tyaj jin je'ej pua'aj ricij i Dios jimi, a'fjna i ti tatyáji'quii, tyajta huatyátaca'nyej tyej tyij néijmi'i jin tyu'tyámue'tin. ² Tyiche' a'fjci jitze rányejnye'rej i Jesús, a'fj pu jitze já'ma'can i tyaj jin tyá'tzaahuatye', a'fi pu ajta a'fin pué'een i ti néijmi'i tyámua' tyí'uurej. Jesús pu jó'viicue'ri' mati'ij yó'tatej i cúruuj jitze, capu jitzán juxié'va'ca'aj maj a'fjna jin jaatatyévi'ra'astaj,

ji'nye a'í pu jamua'reeriaca'aj tijin ti'ij japuéjtzitaren aj pu'ij té'ej huatóotyamua've'sij, ajta uja'ajcáayixij muáca'ta' i Dios.

³ A'íj pu jin, siata'aj a'íjna jitze tyú'mua'tyij je'ej ti huaríj i Jesús, ti'ij a'íijma jitze ma'can jaapuéjtzitariaca' i maj je'ej pua'aj tyityetyúucha'iica'aj, a'íj xu jin quee cua'naj siajta quee tyóoxa'huata'an. ⁴ Ji'nye caxu mua'aj seexúj a'íjna jin huácuuj i siaj nyo'se' siaj sij jaatyámue'tin i ti je'ej pua'aj een i Dios jimi. ⁵ Siajta mua'aj seríj yo'huá'xij a'íjci i nyúucarij i Dios ti jamuatá'caa, a'yájna ti'ij hua' táataj tyihuá'ixaatye' i juyójmua'. A'yaa pu tyé'yu'si' i yu'xarij jitze tijin:

Capáj nyiyóoj tyá'xaahuataj,
i tavástara' ti tyí'mua'itii,
capáj pajta ahuárita' huaré'yi'can
tipua'aj a'íin puéjtzij muaatá'an.

⁶ Ji'nye i tavástara' pu a'yan tyé'itii a'tíj ti xie've', ajta puéjtzij jaatá'sij a'tíj ti a'yan huatamua'aj tijin nyiyóoj. ⁷ A'íj xu jin mua'aj jajpuéjtzij siaj sij tyámua' huárinyij. Dios pu a'yan já'mua'uurej ti'ij ajta a'tíj huá'uurej i juyójmua'. A'tíj tina'aj ti tyiyójmua' a'yaa pu tyámua' tyihuá'mua'tyej i juyójmua'. ⁸ Ajta tipua'aj Dios quee tyámua' já'mua'uurej ti'ij juyójmua', caxu sij mua'aj ji'réc'can jime' yójmua'mua' pué'een. ⁹ Ajta a'yájna, tyati'ij tyooj ti'riistaca'aj, a'íimaj i tahuásimua'ci'ij a'íi mu tyitaamuá'tyej íyan cháanacaj japua, tyajta a'yan tyihuá'astijria'ca'aj. A'íj pu jin, tyiche' jéetze' tyámua' tya'rá'astijre'en a'íjci i tavástara' i ti jusén jin séejre', ajta a'yan tyitaatá'sij tyej tyij jimí júurij tá'ra'nyij. ¹⁰ Tahuásimua'ci'ij mu tyámua' tyitaamuá'tyej íyan cháanacaj japua, majta quee á'tyeej maj a'yan tyí'ta'itii je'ej ti tyihua'ránajchica'aj, ajta i Dios, a'yaa pu een jin tyí'ta'itii ti'ij tyámua' táa'uuren, tyej tyij a'yan éenye'ej tá'ra'nyij ti'ij a'íjna. ¹¹ Ajta a'yan tyi'ja'yájna ti'iquee naa tyú'asej tipua'aj tyi'tíj jin tyajpuéjtzij, sulu a'yaa pu tyú'cui', ma' ajta a'yan tyitatyáhu'i'rii tyej tyij taxáahuaj séjre'ej, tyajta tyámua' éenye'ej.

Je'ej ti tyihuá'uurej a'íijma i maj quee janamuajracuj i Dios nyuucaaj

¹² A'íj pu jin, siata'aj jaajájcua're'en i siaj jin uhuácaca'nye'ej i jumuáca' jitze siajta jutunúj jitze, ¹³ siajta jáahuoonyij a'íjna i juyéj ti huatóoje'yey, siaj sij tyámua' huárinyij i ju'íicaj jitze, siata'aj sij tyámua' tyityaaju'un i Dios jimi.

¹⁴ Siata'aj tyámua' eenye' néijmi'caa jamuán, siajta tyámua' tyityetyúucha'íij, ji'nye tipua'aj a'tíj quee tyámua' tyi'tyúucha'íij, capu a'náj jaséjran i tavástara'. ¹⁵ Caxu tyi'tá'care'en ti síij tyi'tíj jin ootyá'ítzeere'en, ti'ij a'íjna jin quee che' i Dios tyámua' tyaatá'an, nusu ti síij huataséjre'en ja'mua jimi ti seequéj tyo'cájmua'rej ti'ij

a'fín je'ej pua'aj jamuáa'uurej siaj sij tyi'tfj jin ootyá'itzeere'en i Dios jimi. ¹⁶Che' quee a'tfj juxana'cirea'aj, nusu já'xaahuataj a'fjna i ti Dios jaatyájtóo ityájma jimi, ji'nye a'yaa pu huarfj a'fjna i Esaú, a'fj pu jin quee ja'ancuriáa' i ti jaci'tyíche'en, ti ajta á'ria'ra' pué'eenye'ej, a'fjna jime' ti huataí'cuataca'. ¹⁷Siajta a'yan tyá'mua'reej tijin ti'fj jaataxié'vej ti jáaci'tyij a'fjna i ti jin Dios tyámua' tyeetyátoonyij, a'fj pu i táatajra' jaaré'ityaca', tyij ajta jéehua huóoyiinyaca', capu che' huatái'riitariaca' ti jáahuiire'en.

¹⁸Siajta mua'aj caxu ajtyáxiiriaca' i Dios jimi, mati'fj a'fímaj i maj Israel jitze ajtyáma'can, i maj a'áa ja'tanyéj i jirfj jitze jo'tij já'taaca'aj, ajta ootíca'ca'aj, majta jéehua viiyaca'aj japúutzarij jime', ¹⁹caxu siajta jáanamuaajri' ti'fj a'tfj ucájjihuaca' i a'huáj tzajta', nusu ti'fj i Dios tyu'taxájtaca'. A'fímaj i maj jáanamuaajri' a'yaa mu jéehua tyaatáhuaviiri' tiquee che' tyihuá'ixaaty'e'ej, ²⁰ji'nye camu pújooriajva'aj maj a'yan huárinyij je'ej ti tyihuota'fj a'yan tijin: “A'fjna i ti japuan rá'icataj i jirfj, siata'aj tyetyéj jin jaatyáto'sixi'in, capu je'ej tyij ajta cítzij pué'een, che' huámu'nyij.” ²¹Huápu'fj pu tzfnyisi' huasé'rihua'aj i maj jaaséj, ajta a'fjna i Moisés a'yaa pu tyu'taxájtaca' tijin: “Nyényevivej a'fjna jime' nyaj tyí'tziinye'.”

²²Siajta mua'aj, séej jitze xu i jirfj a'yan tyitye'ejtyáxiiriaca' ti a'yan tyaja'rájtyapua'j tijin Sión, siajta chájta'naj jitze jo'tij i Dios ti júurij já'sejre', a'fjna i Jerusalén jútye' ti já'sejre', jo'maj majta mue'tfj ja'tyúusiire' i maj tajapuá tyí'huire' mej mij tyaatatyójtzi're'en i Dios, ²³jo'maj majta ja'tyúusiire' i maj anáatya'aj yójmua'mua' pue'eenye'ej muá'raa i Dios, i maj majta merfj á'yu'si'fj u tajapuá. A'fj xu jimi ajtyáxiiriaca' i Dios, i ti néijmi'caa tyí'ijtye', siajta a'fjima jimi i huá'juuricamej i tyétyacaa i Dios ti tyámua' huó'ruuj, ²⁴a'fj xu jimi ajtyáxiiriaca' i Jesús, i ti a'yan tyu'xá'pu'intarej a'fjna jime' i nyúucarij ti jájcuaj, ajta i juxúure' jin tyámua' táaruuj, i ti jéetze' tyámua' eenye' séejre' i Dios jimi, quee i Abel xuure'.

²⁵A'fj xu jin tyámua' siana'aj siaj sij quee já'xaahuataj a'fjna i ti tyajá'mua'ixaaty'e'. Ji'nye a'fímaj i maj quee jáanamuaajri' ti'fj i Dios huota'jé, capu huó'huu. A'fj pu jin quee i'rfj ti'fj táahuiire'en tipua'aj tyeetyáxaahuaj a'fjci ti a'yan tyí'tajee i jútye' ti já'sejre'. ²⁶A'ájna imuáj, a'fjna i nyúucaria'ra' i Dios pu jaatóoriaxij i cháanacaj ti'fj tyu'taxájtaca', ajta ijfj a'yaa pu tyí'xaj tijin: “Nyajtáhua'aj nu jaatóoriaxi'fj i cháanacaj, nyajta néijmi'i i tajapuá ti tyejé'sejre'.” ²⁷A'fjna i nyúucarij ti jime' yee “nyajtáhua'aj nu jaatóoriaxi'fj”, a'yaa pu huatóomua'aj ti tyu'tóoraxi'sij i ti tyú'taavijhuaca', a'yaa pu'fj tyí'tyá'sij a'fj pu'quij tyu'tyá'tzeere'ej i tiquee tyí'rij ti tyu'tóoraxi'in. ²⁸A'fjna i Dios ti jin tyámua' tyitató'caa, capu i'rfj ti jaatóoriaxi'in, a'fj pu jin jusén jime' séeria'aj ja'mej. ²⁹Ji'nye a'fjna i Dios i tyaj jitzán ajtyáma'can a'yaa pu een ti'fj i tiéj ti néijmi'i tyí'tie'racaa.

Je'ej maj tyityetyúucha'iij muá'ra'nyij i maj tyá'tzaahuatye'

13 ¹Caxu jatapuá'citacare'en i sij juxie've' tí'ij ju'ihuáamua'.
²Caxu yó'hua'nán sij tyámua' tyihuo'tyéjeeve' i maj já'muamuaarej, jí'nye a'yaa mu majta séecan huaríj, majta quee jamua'reeriaca'aj maj a'íimaj pué'eenye'ej i maj tajapuá tyí'huiire'.

³Siata'aj huo'támua'ree a'íimaj i maj eetyánami', a'yan cuxáa mua'aj sijta hua' jamuán eetyánami'huaj. Sijta a'íijma jitze tyú'mua'tyij i maj je'ej pua'aj huá'uurej, jí'nye a'yaa pu tyí'rij ti a'yan cha'tána'aj mua'ajmaj tyajamuáa'uurej.

⁴Miche' néijmi'i huo'tyátzaahuatye'en i ju'irástyamua', majta a'íimaj i jucfnastyamua', majta tyámua' tyityahuóocha'iin i maj nyejnye'i'chej, jí'nye Dios pu huá'xijtye'en a'íimaj i maj je'ej pua'aj tyityetyúucha'iij, ajta a'íijma i maj juxana'cire'.

⁵Caxu huápu'i'ij jaxie'va'aj i túmii, siata'aj a'íjna jin huatóotyamua've'en i sij caa tyí'ijcha'ij, jí'nye Dios pu a'yan tyu'taxájtaca' tíjin: “Canu a'náj muaatátoosij, canu nyajta a'náj mamuuriésij.” ⁶A'íj pu jin í'rij tyaj taxáahuaj a'yan tyu'taxáj yee:

Tavástará' pu nyahuiire', a'íj nu jin quee tyí'tziinye'.

¿Ji'nye nya'uuren i tyévi'j?

⁷Siahuo'támua'ree a'íimaj i maj jamuáavi'tij, majta jamuáa'ixaa i nyúucaria'ra' i Dios, siata'aj a'íjna jitze tyú'mua'tyij je'ej ti tya'raj ja'mua jimi, sijta je'en a'yan cha'taj siana'aj tyá'antzaahuatye'en mati'ij a'íimaj.

⁸Ciríistu' pu a'yan tyí'sejre' íjij, tí'ij ajta tyí'sejria'ca'aj jájcuaj ímuáj, ajta a'yan tyi'séere'ej ta'mej jusén jime'. ⁹Caxu tooa'care'en ti a'tíj jamuáacuanamuaj a'íjna jime' i nyúucarij ti seequéj namuajre'. Jéetze' pu tyámua' tye'mej sij huatyóoca'nyej i Dios jimi a'íjna jime' sij huóoxie've'en, quee sij a'íjna jitze tyí'mua'ajcaj i yi'ráj ti a'yan tyihuá'ijtye' tyi'tíj jime' tí'ij cue'ráj, capu tyi'tíj je'ej tyihuá'huiire' maj a'íj ará'astijre'en.

¹⁰Dios pu a'yan tyeetyájtóo ityájma jimi i tyaj japuan tyu'támu'vejritaj tiquee hua'tá'caa maj japuan tyú'cua'nyij a'íimaj i maj ará'tyeej a'úun tyí'huiire' i ináamuaj tzajta'. ¹¹Ji'nye a'íjna i ti va'cán jin tyi'tyéjvee i Dios jimi, a'yaa pu tyu'tyáto'ra'aj i ya'muáatyee xuure', ajta je'en jaatámu'vejritaj a'íijma jitze huatama'can i maj ootyá'itzee i Dios jimi, ajta i hua' hue'ra' i ya'muáatyee a'áa pu yo'tyáteeraj apua'quéj jo'maj jo'cháatima'caa i tyeétyee. ¹²A'yaa pu ajta i Jesús tyaapuéjtzitariaca' apua'quéj i chájta'naj jitze, ta'aj ij a'íjna jin i juxúure' jin tyámua' huó'uurej i jutyéityeristyamua'. ¹³A'íj pu jin, tyiche' jimí ajtyáxiirej i Jesús, apua'quéj jo'tyaj tyeemí' jo'cháatima'caa tyej tyij a'yan cha'taj tyana'aj tya'ajpuéetzij tá'ra'nyij tí'ij a'íjna. ¹⁴Ji'nye íiyan i cháanacaj japua capu chájta'naj ye'jé'sejre' ti jusén jin séejre',

a'íj pu jin tyiche' jáahuosime'en a'íjna i chájta'naj ti jusén jin séejre'.
 15 Tyiche' nyúucaritze' i Jesús tyaatatyójtzi're'en i Dios. A'íi pu a'íin
 pué'een i tyaj jin tyu'támu'vejritaj. Tyiche' jitzán huátatyamua've'en
 tyajta tatyényij jin tyaatatyójtzi're'en. 16 Caxu yó'hua'nan siaj tyámua'
 tyityetyúucha'íij, siajta huo'tyáhuire'en i séecan a'íjna jime' i siaj
 tyi'ijcha'íij, ji'nye a'yaa pu tya'ránajchi i Dios.

17 Siahua'rá'astijre' a'íimaj i maj tyaja'muamua'tyej i tyeyúuj tzajta',
 ji'nye a'íi mu a'náj tina'aj ja'muacha'íj, a'yaa mu tyá'mua'reej ti a'yan
 tyúuxie've' siaj jaatánamuaj i Dios je'ej siaj tyi'táj jin huaríj. Siata'aj
 tyámua' tyu'muárie'en caxu tyévi'si' rijcaj, ji'nye capu tyi'táj jin je'ej
 tyajamuatyáhuiri.

18 Siata'aj tajíme' jahuocaj, tyej tyij tyámua' eenye' i tyaj jin
 ma'umuámua're', ji'nye a'yaa tu tyá'xie've' tyaj a'yan huárinyij je'ej ti
 tyí'xa'pui'. 19 A'yaa nu nyajta huápu'íj tyaja'muahuaviij siaj sij jéehua
 jahuaviiraj i Dios tí'ij ajtáhua'aj naata'an nyej jiye'tzín mua'ajmaj jimi
 jo'tyávaacaj.

Tyámua' pu tyihuo'tyájtóo ajta huo'tatyójtje i ti jin ja'antypuá'rij

20 Che' i Dios i ti tyámua' tyitaatyéje, ti ajta jaatájuurityej
 a'íjci i tavástara' Jesús, i ti va'cán jin antyúumua'reej, a'íjna jime'
 ti huá'cha'íj i jutyéityeristyamua' tí'ij síij ti hua' cújta' huaméj i
 cánya'xii, ajta je'ráaxirej i juxúure' tí'ij jaaxá'pui'intare'en a'íjna
 i nyúucarij ti jájcuaj ti ajta jusén jin séejre', 21 che' a'íin tyámua'
 jamuáa'uurej siaj sij néijmi'i jin tyámua' eenye', siajta je'en a'yan
 huárinyij je'ej ti a'íin tyá'xie've', ta'aj ij a'yan táa'uurej je'ej ti a'íj
 tya'ránajchi a'íjna jitze ma'can i Jesús ti ajta Ciriístu' pué'een. A'íj pu
 jin, tyiche' jusén jin tyámua' tyé'tyojtzi're'ej.

22 Nye'ihuáamua', a'yaa nu tyaja'muahuaviij siaj tyámua'
 tya'ancuriáan a'íjci i nyúucarij i nyaj jin tyajá'muayu'se'ej nyajta
 a'íjna jin ca'nyíjra'aj jamuatá'caa. 23 Siata'aj jáamua'reej maj meríj
 jaatátoj a'íjci i ta'ihuáara' Timoteo, tipua'aj jiye'tzín yará'astij, nyáaj
 nu já'vi'tin nyati'íj mua'ajmaj jimi jó'me'en.

24 Siata'aj huo'tatyójtje'en tajitzé ma'can a'íimaj i maj ja'mua jimi
 antyúumua'reej, siajta néijmi'caa i tye'ityeristyamua'me'en i Dios.
 Majta i Italia maj já'ma'can, a'íi mu majta yajá'muatyojtje'.

25 Che' i Dios tyámua' tyajamuatyátoonyij néijmi'caa mua'ajmaj.
 Che' a'yan tyá'ra'nyij.